



壹齋集卷十一

當塗

黃

左田

古今體詩五十六首

嘉慶丙辰至  
丁巳五月

題洪編修亮吉同年機聲燈影圖

我生才五年先君卽棄世十齡慈母亡嫂亦相隨逝寄生於外  
家六載若癩贅憶初母在堂我年八九歲能作方丈書顧我獎  
且勵謂可讀父書往往顏爲霽夜窗鍼黹餘課我兄及弟一去  
四十年此境永潛翳覽圖觸我悲曩事合若契君才班馬儔君  
孝曾閱繼機聲燈影中一憶一流涕圖之至再三魚菽以時祭  
伊予本孤陋附君得登第自慚還自拋親骨猶未瘞行當歸焚  
黃已作終焉計薄耕卽無田敢負墓前誓江水寒未波江梅香  
尙細我歸君尙來相思定應處

壹齋集卷十一

題陳肖生

嵩

背面風石藥

今年花事情開遲貌取豐臺第一枝想見曼殊十三四臨風小  
立背人時

錢侍郎

載田盤五松圖爲曹戶部

祝齡題

我生頗好游到處事幽討目中所見松爲君一一考長干撫六  
朝棲霞謁九老萬萬黃山松峯峯翠羽葆窺乎盜爲薪今亦存  
者少譬彼老成人凋謝誠可嬌惟餘師子林黃山連理絕嫵嫵  
庵名枝枝相糾結葉葉互纏繞此是後來秀亦自強哉嬌惜未遇侍  
郎爲我翠烟掃茲圖盤中松厥狀我未曉觀其下筆妙想見真  
松好五株如一株用拙不用巧根如飛白書枝作伯英艸石耶  
與松耶但覺一筆了按圖追昔游兩耳濤聲飽煩君起萬松侍

剗再創萬松稿佳紙壽千年奚止一烏倒

和胡城東鄉味八詠

問政山筍

朝出紫陽門逢人盡肩筍山風吹爨烟饑涎不可忍

蜜林檎

酒名

漢杯琥珀濃黏唇牙欲膠薄醉入黑甜此鄉味差肖

太函山茶

山有明汪司馬道昆別墅庭桂四季皆花

山人司馬孫采摘入雲早庭前桂樹花一盃濃香飽

百合

根如白蓮花花如玉手爐野人棄不嘗養我山中臞

雄邨饅

春風吹甑香歇擔紫陽渡割取白玉肪淪泉煮雲霧

桃花鱖

壹齋集卷十一

二

歲逐桃花來淡藏溪石罅那知武陵人卻在漁梁壩

麪果

羅麪裹作衣實以種種菜山溪十里交油香繞亭內

糗

解包青箬香一裹玉屑熟棗栗已足食況有花豬肉

書蘇子美集後

二十抗疏論時弊出匣太阿鋒正銳那知一折杯酒閒不合身  
為宰相墻手諮七事國計該參政正爾需奇才可憐開濟經綸  
手卻向滄浪垂釣來滄浪水竹日相親興酣落筆驚鬼神三閩  
遭放離騷作李白長流竟殞身當時斷編燈獨守身後遺文付  
歐九祥金寶玉不可理七百餘年光耀手我把君文誦且評後  
有陳亮前賈生倘使所舉皆施行未必不與韓范同時名嗚呼

何必不與韓范同時名

書劉文成公感時述事詩後

佐治宜孫幕追思世祖年長歌當痛哭四海正戈鋌始禍由官  
府招安遂蔓延可憐家國恨徒付醬瓿編

書王弇州袁江流後

一曲太師引翻成小吏行聽他榮落處似覺太分明

丙辰除夕

拗得江梅一兩枝膽瓶斜插對吟詩半閒書屋閒堪臥一載朝  
衫脫未遲白髮傳杯兩兄弟青燈圍坐五男兒不知底事方如  
願打取灰堆似太癡

丁巳二月江行望銅陵山中李花盛開

江流漾微波清風半帆腹十里銅陵山容與送游目李花白如

壺齋集卷十一

三

雲滂瀆滿巖谷時聞花閒禽不見花中屋須臾冒炊烟蒙彼羅  
與穀閒亦襯棧桃輕綃映紅肉沈沈日漸西望望去何速

阻風大通

年少翫大江夜涉逞巨膽中流折牖牙月落雲駢騷人皆蒙被  
臥我獨叩舷喊武昌歸遇風十載怯不敢出門輒肩輿今昔誠  
可感吾師再撫腕請謁首蒙領乃登楚人舟徐行戒勿寔五日  
抵大通捍索逆風撼牽船碇江邨岸艸細如毯門柳綠未花籬  
桃紅已糝青青九蓮華一手可攬貪涉謝不能小住姑流覽  
回睇大江心浪激日光驟何時權平湖綠波蓋菡萏

謁余忠宣公祠

援絕危城陷孤臣竟殞身妻孥盟白水天地尙紅巾七載江淮  
障千秋墓木春青陽山似否南望爲含顰

兩中宋廣文 招飲懷甯學舍

一尊遙對大江開學舍高於江上臺猛雨勢疑浮屋去飛帆徑  
欲上城來縱橫卷軸吟懷適吐納烟霞道氣該他日艸堂須記  
取莫隨雞犬入雲隈

廣文好道

三月廿五日釋菜六安書院臬陶祠簡趙刺史

霖

高陽古才子賡颺協重華奈何狀厥貌馬喙而削瓜諸子固荒  
唐左亦何浮夸滅六事偶然不祀胡為嗟致滋後世疑常以涖  
自遮秋殺春以生艸木原根芽刑官不可為誰為為之耶不觀  
南面坐今猶祀於家

在昔唐虞世畫像民不犯重典用竄流何曾事戮斬殺三宥之  
三語未載謨範鞭朴乃教刑原非酷如闕我來蓼六國賢牧意  
殊歎瘠土民猶姪往往子法參我歌矜青青君諷車檻檻明神  
倘鑒茲期月其少減

壹齋集卷十一

四

示書院肄業諸生

我聞周子隱三害能自除入吳見機雲勵志始讀書又聞紀僧  
真富貴無所須承旨詣江墩乞作士大夫武吏尙復爾況已名  
為儒青青子之矜旦夕公庭趨紛爭持訟牒出入偕吏胥罔知  
冠可溺惟務篋是胫又或羣少年狎邪以為娛累騎引阮咸折  
齒援幼輿妄謂古名士禮法不復拘伊余苦孤陋敬謹懷區區  
諸君盡才俊此事豈有諸但聞人之言昔者迷其塗我願學孝  
侯折節收桑榆不然名副實守身若璠璣彬彬鄒魯彥一一游  
夏徒賡颺獻虞廷再陳臬陶謨

巴孟嘉自欸以蕭尺木畫寄贈

故人致我書勝以畫一幅畫中故實誰文侯段干木憑式過其

盧敬謹到僮僕高八南牖坐短垣繚松竹辛勤守一編披拂案  
上讀是時尙簡策安得有卷軸何況印板書權輿唐之蜀蕭君  
昔圖騷博考古輿服奈何少不檢落筆偶從俗乃知畫有學勿  
以藝事目題詩謝孟嘉吾言太拘束

游鏡心禪林解后楊君並其子景曾周生尙文遂同

步至小赤壁下

肩輿出北門泚水自西折楊花糝面來亂點頭上雪行行逐河  
壩麩麥黃可糲中有豌豆花數葩正清絕精藍僅數椽門外少  
車轍竹樹圍薛牆掃地甚光潔解后楊子雲生徒此環列坐我  
彌勒龕邀我茶瓜設白鷺乳松林巢若置茅菴客來忽驚飛決  
起惟一瞥

僧言小赤壁去此不一里欣然從之游積石丈餘耳隱約見摩

壺齋集卷十一

五

崖小詩無足紀以此勝嘉黃母乃夫人婢羣稱州南山富有巖  
壑美石壁森開張一綫漏日晷行行入永巷巷盡樓觀起中可  
容萬人外以立石倚一夫而當關萬夫莫逾此改月行當游一  
笑姑舍是

過佑聖觀見梓樹作花漫賦

肩輿送客迎朝陽歸途鼻觀聞清香仰看梓樹花簌簌紅雲一  
片停崇岡我家于湖寢魂戀日昨梅花夜開讌月上春衣畫折  
枝風來酒醖浮飛片梅花爛漫桃李開玉蘭承露擎玉杯但愁  
酒盡燈殘後不怕斜風細雨來一從渡江來蓼六枯槁如僧坐  
崖谷牡丹芍藥何地無底事今年眼無福高花百尺齊屋山荒  
城照耀春已殘我欲開樽坐花下卻憐無客佐清歡

四月望日喜雪翁自黔至

甚風吹到足音楚執手猶疑寢乍逢感爾交游類稽呂逐余上  
下似雲龍卸裝先索新詩讀問訊偏懷舊雨濃寂莫荒城正無  
賴一杯聊與話從容

荅雪肩舒城阻雨見懷

胡君訪我六身與輿丁三迢迢七百里自黔來淮南道逢邨店  
雨蹙縮眠如蠶作詩述我客頗聞他人談下直輒鍵戶一載棲  
僧庵我聞古友誼千里簷常擔自爾多勢交覲面言殊廿一朝  
各判袂比戶誰相參何況若行腳而來謁瞿曇君乎誠古人吾  
德何以堪

坐雨與雪肩話舊

夜雨廉纖曉未收出門何處作佳游麥黃甚熟君知否叫徧林  
閒黃栗留

壹齋集卷十一

六

空山陳迹重低回共說山人欲再來今日書堂遙想像牡丹殘  
了石榴開

雪肩以詩索寫新竹次韻

竹類繁有徒幼者名曰篠風致短而清人中陸慧曉胡君索寫  
眞枝幹心了了下筆便支離頗覺枉難矯乃知傳神家全在眸  
子瞭美人本天然詎必腰支嫋愛而遺其形且惜人不眇揮豪  
殊未然此君益天表

洗竹

野竹若健夫縱橫力相抗新萌強出跨怯喚氣不壯柯葉亂且  
交風雨隘而妨呼僮急翦伐審度勢背向狂者絕其根鬱者宣  
以暢卑毋令委靡高勿太跌宕枝枝忽騰騫一一盡張王吟成

洗竹詩請作教士況

新竹十韻同雪巖作

老竹呼僮洗新萌計日高參差碧如玉尋丈綠堪篙積籜旋教掃浮筠且自韜引鞭翻砌艸敷葉礙牆蒿漸覺風成韻相看氣倍豪蒼龍行掉尾翠鳳欲梳毛此日清如許旬時暗忍饜胸中無涓畝檻外有林泉佳客遙來訪題詩慶爾遭不辭疏灌數冀得本根牢

齋後石榴已委瓦礫中親爲攘剔作花頗有韻致

齋後艸堂庫且隘安榴生意已婆娑遺資誰是王司馬種樹吾真郭橐駝盡翦枯枝舒翠羽恰逢新雨綻紅羅辛勤合受司花供自煑新茶一笑歌

于湖聽雨圖

千金難買此平湖一雨能令裸壤蘇更請諸君攜枕簟重來畫

裏聽跳珠

壹齋集卷十一

七

六俗兒病輒於昏暮呼其小名以歸長者則延端公卜禱於神旣復鼻神鳴金徧索諸野謂之叫魂端公者里巫也詩以諷之

云之魂氣竟何之日日羣呼似大癡耳孰能編小名錄屑乾空費大招辭不須扁鵲稱奇劑自倚巫陽作上醫升屋而號緣底事未堪說與病夫知

聞黃鸝漫興

牆西甚熟烏鵲爭黃鸝獨來吹鳳笙淡藏老穀不我見羞與眾鳥喧新聲我病頭風正僵臥乍聞起坐神爲清如逢佳客好言語撲喉而出何分明冬青百尺陰壓屋月季猩紅筍鸚綠延爾來鳴亦足佳胡爲戀此不材木江南艸長春正酣山作螺青水



梁藍願爾翻飛渡江去但言風月勿多談

登六安城樓望武陟山

日暮登城樓眺望胸臆遙山送青來云經漢武陟南巡當日  
江陵回登禮天柱由瀟來道逢岡阜一登覽拜郊遂爾留層臺  
禮成浮江自東下惡浪狂蛟手親射舳艫千里揚清歌北至琅  
邪未休駕此山卓立何足奇禮容法駕曾見之不知攀援上有  
幾千尺爾時可有勇之公孫諸人隨我讀爾雅釋山山多名三  
襲者陟再成英大山圍繞小山霍一一疏證何分明今茲英霍  
縣名系或者此山亦會意況其峯巒數恰五定是當年字譌替  
不然東秦石閭卑小皆備書何獨遺此不登於載記須臾日落  
天宇清歸鴉肅肅投荒城山名附會隨處有地志牽合何須爭  
卽如衡霍兩山並名曰南嶽安問道旁之山誰經行仰天一笑

繁星明

與雪肩試太函茶卽以寄謝孟嘉

一緘珍重付長須握手新香透紙糊莫詫淮南自尊大有人天  
上寄雲腴

四淮南王

英布

爲王弑帝笑黥徒背項歸劉誤腐儒向使堅兵兩無附何妨南  
面獨稱孤事由姬侍從人飲身續彭韓一例誅置陳尙令天子  
畏茲鄉應悔娶于吳

劉長

高帝諸王僅一人入朝同輦最相親金椎報母斯爲孝黃屋稱  
尊太不臣自詡乃公材有力卻傳二子驚難馴不知布粟歌誰

作似議周公未盡仁

劉安

少小分封禮數優驕王何事蓄陰謀宵中兵畧披圖按海上仙人給漢求千載尙傳鴻烈解一言竟死武安侯可憐白露霑荆棘空使將軍涕淚流

李憲

羣龍野戰血元黃屬令乘時也陸梁不識識歸銅馬帝安思尊並井蛙王九城自擁因江賊七載逃誅後莽亾帛意封侯陳眾祀竊名徒爾附昌芳

泚水懷古

泚軍清口正圍棋銳士提戈斲雪馳舞槩直趨師古壘涉河惜走五經兒劇憐公等勤王歿不見元凶弑父時太息臨流思往

壹齋集卷十一

九

事青蒲獵獵晚風吹

聶四將軍

將軍六人至正末兄輝以元帥降明太祖將軍義不屈觸九公山石炭

將軍誰元帥弟將軍名佚行第四淮泗真人興江東元帥率師屯九公元帥降弟不從以頭觸石如共工魂魄毅兮爲鬼雄時或見之風雨中

四烈女

四女失其姓氏皆明崇禎壬午殉節者事見六安志

獻賊陷六歲壬午佑聖宮前遇一女女貌嬌如花賊騎擁之上馬揮馬搗女口罵不絕汝有桃花馬我有桃花血汝肉啖我不齧賊碎刃之罵不絕

城上女如弱柳城下賊如獬狗女投城濠賊爭取竹竿尚有節  
女灰心已決城濠何清泱可以茹我心

負販妻色姝美夫身雖賤微義不從賊  
此婦可愧二臣之男子

少婦匿重樓賊退官兵搜逼之不肯從強之惟斫頭墮口噙  
張目皆裂有光殺人如艸官兵狂大驚失色走且僵此婦何減  
張睢陽

五日楊召林景會兄弟具舟泚水招游鏡心禪院

野艇平鋪布作篷水波瀲灩樹叢叢雖無簫管兩頭坐卻受清  
涼四面風登岸桑麻迷近遠入門花竹眩青紅不辭酒盡歸途  
晚要看溪山煙雨中

鏡心庵園竹生筍一莖兩歧當楊君筠邨教授之地元

壺齋集卷十一

十一

劉美之續竹譜載瑞竹合歡發地尺餘分爲兩竿與此  
適合筠邨諸郎竝隨侍其科名之兆乎因題其楹曰瑞  
竹堂仍賀以詩

琅玕千个翠雲濃一榦雙竿喜乍逢  
簫史徵材應竝截管城拜  
爵欲分封人中麟鳳生同日  
王應鳳爲應麟弟少麟八歲與麟生同日科目郊祁慶  
接蹤我更吟詩供一粲老筠猶欲化爲龍

六安依岡阜築城外嶄然而內與民居平戲書一絕

柴門斜趁女牆開一帶清陰蔭綠槐  
只道經行猶曲巷不知身  
已上城來

以詩代書寄初民中民少民三兒子用昌黎示兒詩韻

自我來六安兩月無家書  
二月初七曾否移吾廬  
牀頭阿堵物所用可有餘  
中堂五日筵可能辨蒲竟切魚蔬汝伯時出游何

人嘗相於我居六無恙枯坐如守株幸有竹一叢新篁翠交敷  
開窗對玩之清韻風吹噓書院凡五層寬可八九區我才住兩  
閒餘屋皆空虛前月月之望雪肩來與居相訪七百里不以道  
遠疏涉江苦膠轕遭雨霑襟裾行誼真古人可媿今士夫山城  
百無有甯止歌無魚長日思汝曹失學爲憂虞飯罷畧無事賔  
唱聊嬉娛人身靜欲動不樓看戶樞沈思頭風發岑岑戴山如  
乃知少年時意氣何其羸汝曹各努力毋舍車而徒經書富孰  
讀邪妄當自祛慎勿至我年身已衰病俱齷齪憂飢寒甘爲小  
人儒作詩付五民勉哉少中初

中民少民劣於書雪肩用昌黎符讀書城南詩韻作詩  
規之感其意賦答

古者易子教吾聞諸子輿後世著家訓乃獨成爲書不知身教

壺齋集卷十一

十一

兒紙上言皆虛豈惟俟長大端在嬰孩初我家子弟愚不足高  
門間卽我況諸子已不能我如我年八九歲齧筆時爲魚大書  
松風堂心膽真羸疏惜性太頑劣猶可說與渠襍戲靡不爲獨  
厭兒牧豬刈印取狡獬琢硯鑄蟾蜍東塗與西抹甘帶如蝓蛆  
我今五男兒惟知仰屋居大兒君所知果克負荷歟仲叔尙如  
此呀呀況其餘要知致此因匪且有且卅年困行役墓艸何  
曾鉏雖亦謬通籍未跨京國驢荒田寒不耕卻爲人燒畚心勞  
輒少暇及歸歲已除開年行又別顧之涕霑裾一任惡札惡誰  
復爲毀譽幾成邨學生鄙陋居郊墟君詩如勸學使我懷以舒  
引喻而罕譬何便便諸諸賡詩用相報放筆心躊躇

書施愚山先生康熙壬寅至丁未五年詩稿後

稿爲漁  
洋山人

一編瓦甃果能全流落人閒百卅年此是愚山真面目幾人璞  
玉到今傳  
陳思自昔好譏彈勒帛紅猶溼未乾不似時賢多諱疾三分讀  
作十分看

臺齋集卷十一

十一

平水齋

陳思自昔好譏彈勒帛紅猶溼未乾不似時賢多諱疾三分讀  
作十分看

壹齋集卷十二

當塗 黃 鉞 左田

古今體詩五十八首丁巳六月至七月

雷斧

風伯雲師鍊偶存  
般門誰遣弄雷門  
廣寒未許吳剛借  
劈正曾臨赤帝尊  
傳玩有時兒失箸  
指揮當日雨翻盆  
而今斫壞渾無用  
流落人閒尚玉温

過夏生承恩城南書舍

書舍城南一畝寬  
繡毬花老出檐端  
我來惜過春三月  
不見玲瓏玉萬團

雜興

何處蜂窠曉放衙  
羣飛如雨鬧檐牙  
可知園館飛英盡  
來采冬

青瑣細花

檻花明豔黃居窠  
砌篠娟妍管仲姬  
畫本眼前人不識  
枉調膠粉事多師

黃茅蓋屋兩三家  
水濶濠深不用車  
閒卻健兒好身手  
沿城十里種荷花

花皆營卒所種

風前雨後獨憑欄  
最愛牆陰竹數竿  
枝網蛛絲蟲篆葉  
青青能得幾回看

世閒豈少拖腸鼠  
月裏甯無竊藥娥  
上界仙人渾不解  
只緣讀得道書多

親調鸞鶴降諸真  
共說麻姑技獨神  
擲米成珠才幾粒  
也將狡僧賺天人

神仙吐納本清華  
墮落多由一念差  
休詫握苗何太急  
近來焦

穀尚生芽

移榻

移榻當階坐披衣受晚涼瓶花凋日及檐竹度宵行聽雨懷鄉  
劇緘書倩客將相看飛鳥倦眠不待三商

山齋聽雨借東坡洗足關門聽雨眠句成三絕句

洗足關門聽雨眠三杯老酒已陶然笑儂句當成何事覓句鈔  
書過一天

焚香掃地攤書坐洗足關門聽雨眠但願山田秧有水不愁茅  
屋爨無煙

嬾向槐根尋富貴不將服食擬神仙先生只要清涼屣洗足關  
門聽雨眠

茶船三十韻

壹齋集卷十二

二

尊彝古有舟杯落方言註茶船近始出野艇形畧賦濫觴起何  
人沿緣效若鶩剗中三雅承飾外五采具薄削秋瓜皮輕脫春  
花跗執無濯執煩持免滿溢懼盧椀見未曾蔡錄缺誰附空中  
木爲俞短而濶曰觴名從博士呼船令共鼓妒清談客對方雜  
坐僮競渡門勝藏壑源揆奇泛雲霧屏曲招招來花密攢攢滌  
醉並羽觴飛蕩鄙鞵杯汗有時墨沼橫小泊研山住湘簾綠送  
波禪榻煙徐度水厄避王濛火活待陸羽一杯浪微生三沸湯  
初注校量客坐陳甲乙我目遇一器制雖微四方工所聚燒籃  
豫章良梘皮黔獨固黦歛螺漆填楚粵銅錫鑄活剗瑋瑁爲巧  
琢琳瑯作剗木復編藤水蝕而蟲蛀棄置刺都籃玩弄到童孺  
山齋六月涼馱雨三更澍虛檐支竹爐溪甌浥荷露拍浮謝航  
船縱浪入茶務沈溺奉昔箴游戲成短句不獨酒醉人善謔亦

妙論翹首望松蘿歸舟及時雇

六月四日曉雨偶成

掃地開門攬客眠起來窗竹綠如煙不圖清簟疏簾日重過黃  
梅細雨天千里寄書修我屋六時枯坐學僧禪叵堪九夏偏逢  
閨逆數歸期日似年

剝啄從他客去嗔吾言於子不當聞安心畧隱烏皮几繞鬢偏  
來豹腳蚊檐溜注階清滑笏厨煙穿瓦白流雲閒中卻有心功  
課禦溼鞞藪著意焚

新竹傷於蟲枝葉衰其大半詩以悼之

窗前茁新篁我曾一再賦枝柯無點瑕澆綠如霧不知始何  
時條爾生二蠹其一爲毛載葉底藏身固篆蝕白如紙膠附尙  
不恕其一爲膩蟲密授枝頭布瑣細魚卵如彷彿恆沙數滋蔓

壹齋集卷十二

三

本難圖手足無所措披枝恐傷根歎息不忍顧檐雀見嬾啄啄  
亦足難駐腥但引蒼蠅洗不怕甘澗眼看蠶食盡惜未蠲氏遇  
去膩尙有方治魚水頻注不然久自飛去與蚊蚋聚惟載最凶  
毒痒肌不敢捕因思蠹畏芸多買竹根炷又聞桐子油其滓可  
殺蛀熏之兩無驗蠕動尙如故虛糜杖頭錢枉被眾口誤徬徨  
正無策竈下養忽怒揮刀芟其繁一一使透露初猶惡其鱗徐  
察理忽悟多由葉混淆致令二蟲據姑息誠養奸決勝在旦暮  
斷指而免頭不得已而去清風頓蕭疏螢任飛度懿茲少許  
佳還我瀟湘趣更須大雨來一洗涎所汗

寄題茶葉嶺雲液庵

箕槽溪邊拓一龕山僧衣衲滿雲嵐年年穀雨初晴日自摘新

茶對佛參



六月八日繞城觀荷花歸而書此

曉風吹我鄉寢回檐鵲爲語荷花開披衣盥漱出北郭沿緣直  
往城南來翠蓮十頃捲綠浪花如白鷗漫浩蕩但有清陰碧樹  
垂絕無水榭風亭傷我爲荷花一往還滌除塵霧胸懷寬數枝  
拗得膽瓶插聊作崇仙院外看

陶塘荷花以崇  
仙院門外爲勝

觀善堂玩月

苔葉綠逾闕榴花紅過牆一江鄉信隔六月客窗涼寢斷青綾  
被詩添古錦囊山房好明月那不憶陶塘

地潔行人少庭虛受月多烟低近窗竹香度隔城荷不飲樽空  
綠捐愁鬢已皤遙憐小家樂兒女踏街歌

林厯山漢銅鏃歌

胡君贈我古銅鏃云昔得自黟縣林厯山吳將賀齊討陳僕用  
壹齋集卷十二

四

以血此熊罷殷紅泉瀉雨山腹裂老僧拾得一二來松關滿身  
瓜皮綠血點朱砂斑鏃銳橄欖核鋌斷鼠尾殘按之爾雅考工  
記恰類骨髀非若金鏃寒三刃厯年久鋒在模稜閒當時羣寇  
山顛蟠自下上上攻之難長槍大戟戰非利惟有萬矢仰射可  
以陵嶼岬那知餘勇漫入石藏之千載留與僧俗相傳觀一鏃  
乃至微斷非出欺謾卻笑今人骨董但耳鑿雷回古鼎雙魚盤  
銷鎔古鏡鑄偽器塗抹青綠如痂癩沈檀彫几煥室供宋錦作  
墊涼堂安旁觀有人笑捧腹是出我手親鑿刊何如此鏃不用  
一錢買坐獲季漢貞金看但恐兒童錯認錐不利貫之杖足扶  
以登險艱吾家赭山圮塔亦有赤烏二年髒幾時儷爾一話孫  
吳還

書傳山谷艸書法畫在梅清伯仲閒要識此君不凡處挑燈乘  
醉寫秋山

唐子畏吳閶圖

千船狎恰聞門橋艫前舳後紛喧鷺欲進不進出不出飛閶張  
蓋來官艘東裝花竹西甕盞頭撐肩撐不得上渠儂跳蕩誰復  
聞擁騶彼自前頭唱閶門橋洞高於城一人抗肩橋洞撐熙熙  
攘攘不相管橋上人方萬蟻行舳聲嘔啞復啞復啞稍遠河流聞  
汎汎綠波翻動作魚腥兩岸停舟猶七八別有長虹字萬年赤  
欄高並行人肩扛輿走馬出復溲酒旆魚標斷若連糧船罷運  
閒且艤花犬驚人吠不止相看白日青山銜輪與紅妝舵樓倚  
風吹旗腳飛檣烏我昔六度聽吳歛玩久那知是圖畫身在蓬  
窗與客話

金谿庵爲雪舟作

壹齋集卷十二

五

茅庵聞說足幽棲繞屋琅玕萬挺齊與子何時編竹筏臥吹石  
笛到金谿

石笛谿西  
廬所產

唐子畏渡海羅漢畫稿

羅漢巢天台沖舉捷猿鳥海水才一杯徑渡可自了緣何具神  
通種種矜慧巧示現香象馴攝伏乖龍擾坐誦虎頂經行禪花  
出襍七寶裝蓋幢六賊褫牽繞憂愁若胡孫枯癯類邨媪誕登  
神飛揚未濟波浩渺鱗能鬣以飛獸或翼而爪最後有二僧幻  
姿更絕倒巨鼈不戴山呿口儼窮島跣跌擁經坐芻拔一稚小  
卓錫高拄唇似亦畏其齧抱虎可忘機剖瓜除熱惱奈何恐怖  
心向爾未盡勦六如居士身佛理素精曉偶鋪鵠紋綾創此天  
龍稿九朽才一罷已自整且好但惜美人面粉白未盡澡

第二  
羅漢

衣袖中有美人面將毋塵登伽不爾亦梵嫂胡爲衣袖中著一  
葢取敗素爲之也  
天花莖色界頗未離唐生太狂狡何時正本并合藝旃檀寶

夏日湖上雜憶

芳艸綠隄五里長亂蟬聲裏送斜陽垂楊垂柳陰如幄不隔荷  
花種種香

小閣疏櫺面面開湖波澹蕩復潏澗生憎泗水邨童劣時作耕  
牛浮鼻來

自支竹繳欵柴荆難得湖山雨後晴卻費主人供菜把梅花樹  
下摘蔓菁謂馬千之

占斷山房忘主賓筆牀茶竈鎮相親先生起避敲門急卻是尋  
常索畫人

綠鏡無風柳不搖樓臺倒景鑿秋毫游魚也覺人間樂裂水時  
跳數尺高

壺齋集卷十二 六

紅蕩花中螢火飛綠楊枝上月當扉葛衫蕉扇輕無汗不用籃  
輿步砌歸

不惜千金購畫圖襄陽真蹟已模糊農家自有雲山稿浣筆憑  
欄帶雨摹

蚶蠣時邀山衲議甘蕉不怕竹君彈何須一服清涼散自有人  
閒快活丸

一無所得畫書詩三不如人曲酒棋只合此閒鋪枕簟臥看山  
水避炎曦

山茨水檻吟哦徧竹月荷風記憶多乞取漁師名也稱今年雙  
鬢已全皤

陳章侯戲嬰圖

一兒手把荷芙蓉，拳足跳盪爲前驅。口呿不合聞歡呼，一兒曳杖拖長裾。頭戴面具，面有須，身頭各半行。難趨似呼前者姑，徐徐後追一兒無所娛。不鞵不袴，冰雪膚才逃乳。下須人扶稍，踏蹬之當呱。呱何物，老嫗生三雛。愛玩奚減明，月珠天真爛。漫天爲徒無榮辱，無賢愚倦便欲。蹶飢則舖，稍長卽令親。詩書憂患乃與婚，宦俱不知識。字胡爲乎，人生此難餘。可圖我曾愁，叫如兒。如可憐，霜雪盈頭，願四十八年成老夫。

喜雨

雷鼓不停搗癡龍，忽驚臥黑雲。山嶽頽雨，點杯盃大，但令田禾蘇。那惜窗紙破，嗟予無田農。微生仰春磨，四體旣不勤。八口又難餓，念此豈甘霖。直是天倉墮一點，一粒如清風。爲揚簸，遙想萬山中，婦子起相賀。

趙文敏臨李唐晉文春秋圖

有引

七

圖藏六安鄧孝廉

成

家紙本水墨畫高一尺長三丈有

奇卷尾文敏自題詩云：隍杌居蒲日，艱難奔狄時。天方

興霸者，數子實從之。歲久丹青遇，人賢簡冊悲。至今編

上路猶憶介之推，明永樂括蒼祝。廷心跋謂公此圖有

黍離之悲，觀公詩可見仇山却題亦云：霸業有歸天，意

在孤臣掩卷重嗟咨。益信祝言不謬，前後狎縫皆馮開

之祭酒印。按圖爲李唐本名晉文公復國一名晉公子

奔狄文休承巖氏書畫記。又謂之晉文春秋雲煙過眼

錄云：喬達之藏其上卷，欠下卷。此正喬所藏上卷也。清

河書畫舫云：松雪有詩卽今卷尾所題，第遇作暗爲異

耳

重耳居蒲日天心啓晉基安危賴狐偃宛轉避驪姬歷國民情  
稔勤王霸業垂讀書頻想像掩卷見須眉誰遣王孫筆來傳公  
子奇直從奔狄後寫到納秦時偃蹇雙旌導倉皇六騎馳渭濱  
船待渡宋殿馬初遺稽首承天賜周旋報楚施醉謀方野適醒  
逐笑戈遲秦穆歡歸女懷羸辱奉匱畫之次幾如禽獸行猶騁  
黍苗辭雜霸誠羞道橫圖且共披山川舊汾晉官室古茅茨馬  
出曹韓上人兼顧陸姿平林何茂鬱遠水亦逶迤墨淡渲彌厚  
皴圓簡益宜真龍今乃見鷹鼎彼何爲始信鷗波法多從晞古  
師纍纍藏弄印恨恨自題詩不惜徇顛顛專憐失介推宋亾空  
涕淚罪出枉嗟咨七事公誠絕瀕危國豈支銅駝休再泣莫遣  
阿兄知謂子固

仇英明妃款塞圖

畫齋集卷十二

八

竟甯元年單于朝願言增漢馭弓刀甯胡闕氏乃拜號郎中十  
策言空勞茲圖歸國從如水鉦鼓謹闡旗旖旎賢王咎齏爭後  
先一人悲愁眾胡喜明妃低首駝曳車前頭胡女囊琵琶塵沙  
全湧數十騎兩橐它載呼韓邪擅廬高覆繡被擁身半畧如蠶  
未蛹斯時欲借博浪椎奪取蛾眉入關隴誰令青冢艸離離畫  
圖千載繫人思那知見嫉被讒出亦有降王伊秩嘗

題文簫采鸞故事

日書十萬蠅頭楷仙蹟於今尙有存下界夫妻誰得似鷗波亭  
主趙王孫

李英公療須圖

垂髻兩婢夾藥鑪公將雙手梳其須牀頭老姊若顧語一時意  
態和以舒纒經昔爲舊君服生噉故人一塊肉彼鬢鬢者更幾

何但要與姊數進粥公須爲姊燎未灰君王曾勦和藥來可憐  
阿武禍機發公須公骨皆塵埃

題金葉山水墨蔬果八種

藕

沉瀝玉槩凍合瓊瓏冰柱嵌空鄉味鄭塘最好不論新花白紅  
鄉人謂初出  
藕爲新花

菱

殼如朱紅黍釀肉作秋海棠香可惜君謨未見只寫吳菱兩行  
芡

雨晴葉如盤大日出花向東敷君莫笑蝟毛磔中自有蚌胎珠  
芋

脫毛畧似蘆葍截肪正類肥羊不屑嬾殘牙慧頗愛仙人石香

蓮蓬

壹齋集卷十二

九

綠珠顆顆內孕紫的房房倒懸收取敗蓬滌硯猶帶餘香入泉  
烏茨

味腴欲弟紫栗漿寒可子黃甘夜半酒醒人渴乞取痴兒二三  
核桃

青膚著手欲爛玉瓢對面同皴自是中有傲骨不惜碎身求仁  
薑

園客歲收一稜廚娘用足三時最愛新芽乍剝赭黃微暈燕支  
涼意

昨宵雲翳月際曉雨迎秋涼意鴉先覺聞齋客尙留猩紅金鳳  
落雪白玉簪抽卽目成孤賞微吟暫遣愁

鄧古球成山館

久識巴西富弄藏新秋握手快新涼碧雲滂瀆篔簹谷翠羽葳蕤薛荔牆到眼烟雲兒供養賞心彝鼎自評量黃金合鑄清臣帖先爲君家署艸堂

王蒙林泉勝集

鄧藏顏魯公蔡明遠序真蹟誠題其堂曰鑄顏款作篆書云香光居士王子蒙爲雪庵開土畫於黃鶴峯下

香光居士王子蒙巖棲谷飲黃鶴峯林泉勝集偶落筆樹石清潤烟嵐濃天風吹瀑明珠碎下有高僧與客對團蒲不用話無生詩卷終年在童背渴苔密點漁網皴樹陰山翠時撲人五百年來無此作風流直逼趙王孫

王蒙友鹿圖

款云至正十一年六月八日黃鶴山樵畫於湖山海浦却舍後有沈石田跋

雙鹿下飲幽澗淡一人隔澗抱膝吟層巒墨巘樹交翠兩忘人物無機心畫時至正元季世其年壽輝楷稱帝逐鹿中原得者誰淮泗真人起匡濟山樵避亂棲黃鶴飲石泉兮蔭松柏胡爲走險入朝市友羣卻忘山中樂邀僧觀畫致足佳禍機那得從中來似聞犖确潺湲處呦呦尚助松風哀

沈石田送行圖

並引

畫齋集卷十一

十

金以賓者石田祖姑孫館於沈十年茲圖其送別也圖後有序其畧云金君以賓吾兄也以詩鳴於鄉先人致諸塾爲幽弟應蟾應奎二姪師七年先人歿周又屈之三年其誼如一日也又云子弟之承教也嚴不藉夏楚變不至姑息諶諶懇懇務欲底成又云非特序夫離別之私因併述金沈二姓之好之由俾兩家子孫知重而毋忘也嗚呼石翁可謂賢主人矣金君亦不愧良師哉故記而係之以詩

艸堂面南湖左右種楊柳渠水聲活東渺渺出湖口送者四五

入長隄肅拱手前行忽回頭拄杖立一窠似聞贈以言惜別召  
某某歡欣隨二童精神頗抖擻肩擔復手攜行李襍尊酒扁舟  
諒不遙尙欲爲翦韭圖爲成化庚子人日造載序而載圖若重惜其走處  
不至姑息嚴不加杖扣諄諄務底成如是十年久要使子孫知  
德義重山斗我觀歎再三此道今烏有主人旣不誠師亦誰善  
誘勤怠視束脩十嘗有八九否卽爲揚譽生徒若朋友推去嗟  
又來唯唯而否否致使守錢奴放肆若雞狗是誰之過與先生  
所自取我欲摹斯圖俾自鑒其醜更欲刻其文銘之於座右師  
嚴道自尊毋爲習俗狃

玉簪花

潤葉逢秋碧新花逐日增洗經三寸雨抽出一條冰香稱雲鬢  
膩珠添露顆凝欲簪還自笑髮短卻難勝

壹齋集卷十二

十一

七月三日夜坐有花竹齋

露下三更靜風支七夕涼樹頭銀漢白牆角玉簪香客議留叢  
桂情多戀宿桑臨歧歸忽嬾爲怯路途長

別六安諸生送者

朝暎射東關諸生肅冠帶送我十里餘離立三十輩握手話因  
依脈脈不忍退我來僅三時能得幾晤對學殖久就荒何嘗有  
教誨感茲情意淡慚愧生慷慨黯然舍之行諸君幸自愛離愁  
萬斛來肩輿豈勝載



賞塗 黃 鉞 左田

古今體詩五十七首

丁巳七月  
至除夕

六安舒城之間農家蓄鶯轉販固始歲以數千計過黃  
陂湖見鶯絲捕魚感賦此詩

鴛鴦不茹暈但齧湖邊草  
參之食有加糠粟稊麥稻時時浴清  
波愛惜羽毛好於人絕無爭無故殺不了鶯絲最貪殘  
匪魚不能飽春夏乳子時遺矢樹為槁以其肉腥臊不足  
佐鱸羹遂使萬為羣得以天年老造物苦不平佛理因誰  
造願移鶯絲心一視籠中鳥

木棉花

木棉若秋葵本高不及半功與桑麻均羞供園林  
翫拾子趁朝

壹齋集卷十三

涼滿地白雲爛但須二頃田何用千斤炭

芝麻花

胡麻滑且香仙人以為穀開花致亦佳深杯白如玉  
一枝結一包其子千百族石羊慎勿來不足果其腹

荇花

荇花黃如雲左右流湖壖初陽晃朝光著色彌新鮮  
豈不傍菱芡開落全其天欲倩馬和之圖入關雎篇

淡芭菰花

葉大吁可駭花紅亦可憐棄花取其葉曝之黃且蒿  
南船溯福漳北車走幽燕惜哉花共葉化作塵與烟

蜀黍花

厥包兩頭織中有百琲珠其顛如馬纓亦花而亦須  
山農稱旱

穀可以療饑驅第恨地力盡能使山無膚

過廬江感焦仲卿事作

子甚宜其妻父母不說去奈何焦仲卿以死殉厥婦阿蘭有小姑阿母無稚孺不孝無後大小吏何足數萬古惟姜龐珍羞託鄰姬久之姑感慚呼還復如故仰事俯蓄聞詩也誠無負寄語後來人勿爲詩人悞

泊青帘鎮

一簇白鶯隊幾叢紅蓼坡歸農投店早

桐城秋禾再成晚收較無爲幾遲一月鄉農每

于其隙百十爲羣趁無爲刈熟村落多爲逆旅以待其歸過時則否晚渡趁人多水縮沙留蹟風微月皺波青帘殊不見如此夜良何

曉發無爲

曉起占旗腳東風又打頭五年尋故道三日滯行舟白露猶餘

壹齋集卷十三

二

暑黃雲幸有秋誰憐月如水終夜湧河流

丁巳十月十日先墓焚黃

跪捧金泥誥一通吞聲忍淚讀難終康強如在榮猶晚魚赦何堪祭不豐隔歲焚黃貧失禮今年揃白病成翁回頭卻顧諸兒立欲學箕裘愧冶弓

客自烏江來得韓瓶二枚乃韓蘄王背寇軍所負者誤

稱爲淮陰侯物歌以示之

烏江水涸沙岸傾中有陶器如嬰形里儒不識強解事云是淮陰侯酒瓶那知韓岳曾置此用以名軍爲背寇黃天蕩裏功不成七百年來墮江水當年親隨勇絕奇一把雪執信字旗紅袍墮馬額自割想見英雄痛飲時一朝解柄家居後騎驢湖上仍攜酒卻將軍校換奚童往事悽然重回首摩挲几案焉用之商

量惟作膽瓶宜還愁百卉都難稱高插寒梅一兩枝

十一月九日子卿招飲湖亭爲消寒第一集

放浪閒身又一年溪山好處日周旋寒猶未峭交初九月已分明  
明過上弦盧橘花繁香太冽紅梅枝老影逾妍行吟卻笑天隨子  
奄有吳松賦自憐

子卿見答次韻

擬租耘老屋三閒竹榻蘆簾方便安靜挹溪光研墨坐遠延山  
色枕書看梁鴻有爨甯因熟范叔無袍亦送寒領取當前意無  
盡雙輪自昔似跳丸

果子狸

有獸維狸醜貪饕復善援一生耽果核抵死伏林園肥白真如  
瓠膏腺怕近暄身猶呈玉面尾果掉烏犍憶昔黃山住宵聞碧  
樹喧嘍聲暗稚子燭影走飛猿歸路經新嶺門生拓舊軒殷勤  
下徐楊魚炙薦陶盆味異新嘗指臆肥遠過豚爪牙殊不利刀  
机亦何冤未賦狙公芋先縣君子貺然臍誠可戒自取悔何言

釋梅根執弟子禮問詩於鐵詩以示之

上人歷陽杜師雄之旁支所種梅尙活因號梅根師昨袖詩來  
謁頗通文選辭師來眾香國請以梅喻詩梅初抽條時直上無  
旁歧漸且發杈極漸且披繁枝五年十年中千花萬花垂直幹  
忽盤屈乃弄橫斜姿疏繁總及格妙比丹青施孰爲王元章孰  
爲揚補之畫工與化工不辨誰所爲當其照晴昊亂插非炫奇  
及至揚孤芳空裏香逾滋深山悄無言自露冰雪肌慎勿效盆  
花束縛成支離慎勿爲唐花火迫供兒嬉不觀乃祖植古榦豐  
山斂年年春二月始一吐晴曦蓋其積也厚其發乃爾遲我詩

不足學翫梅當自知漢魏泉三唐一一具於斯師乎苟參悟古  
香生硯池

卽席偶成

卷簾赭山入坐落日紅霞滿窗靜聽水亭拍浪宛乘風船帆去  
江醇醪十盞五盞健鯽一雙兩雙歸路城門欲闔山寺烟鐘已  
撞

溪山好處亭消寒第二集

冬温地氣升路滑汗霑肉撤爐賦消寒奔走活僵僕盡開六扇  
窗又對一湖綠波爲瀾爲淪梅若某若菽俯仰皆可憐何賞爲  
我獨北山園再新東鄰宅三鷺主人知誰何而我嘗不速浮觴  
愜素心誦選有白足時梅根持所作詩見示明月瀉中庭坐暖一方玉墜  
夕當更來前後客仍六

壹齋集卷十三

四

感事自和前韻

我無聲色娛不辨絲竹肉吟詩殊不佳韓蘇所奴僕閒祇好出  
游對花浮蟻綠雖有五男兒誰解謀半菽歲暮日斜時愁坐書  
空獨時提卮年裘去效五羊鬻婚嫁復鼎來逼迫如火速坐此  
損道心因之裏游足譬彼饑渴人強奉以珠玉佳月方當頭且  
翫十五六

袁氏子起鳳幼盲於目以彈詞奉母三十年聞其自縊  
死詩以哀之

兒盲不能養兒口幸能唱兒唱乃得瘡無食傷母心歲寒忽呼  
母盎中有糧否母言兒不唱我死屬誰葬安得白米堆飛入家  
中來盲聽默無言是夜梁自懸阿母抱牀哭急召諸伯叔揀點  
盲所棲但有牀帳褥諸父謂阿母兒唱得錢厚何至三十年死

日一無有乃搜阿母寢白金四十餅載啟阿母牀青錢萬萬藏  
諸父大傷悲兒何負阿母逼迫至今日何以慰母朽持金市美  
棺將錢買吉地是出兒口來還送兒身瘞前年城西人兒病臥  
不起憂兒不得生先兒自縊死今年見其兒已百叟紈綺千金  
日呼盧百金夜宿妓父鬼方呼冤兒樂乃未已此父與此母兩  
兩遙相望不慈迫兒縊慈復爲兒亡我欲起盲兒爲我唱此辭  
寄言父母心慎勿生讎歎

望日三集湖亭雪作遽止再次前韻

身瘦衣裘豐如壁好殺肉

釋文讀如字

行行肩不勝願脫衣吾僕忍

寒復不能步想春草綠平明稷雪飛打瓦若撒菽嘉客有夙招  
買醉不肯獨觀魚先眾來得魚趁未鸞嚴飈忽遽興清景去何  
速茲辰雪未成昨者月看足傳觴爲引滿手若握暖玉逍遙隨

壺齋集卷十三

五

地佳安用館築六

雪後簡梅根

爲憶濱湖寺今宵詠雪僧折梅供古佛淪茗炷孤燈山近風欺  
屋詩成硯有冰來朝應寄我呵凍和還能

書笠澤叢書後

一卷叢書冰雪清躬耕意只爲逃名賦昔憶菊吾能辦卻欠先  
生屋并楹

廿一日消寒第四集分賦得鷗

鳧鴛鴦雁鷓鴣鷓鷓黑鷺白鷺或蒼鷺若鷗也滅沒浩蕩湖中央  
鷺好風鷗好雨寇鳧蔽天不可數淘河漫畫覓食苦曷若鷗也  
可狎不可侮西風浩浩波漫漫湖亭雪霽來消寒眼中數點白  
如雪知有真閒不我說我今緘愁強自歡五日十日湖之千鷺

鴛鳧雁如等閒愛爾饑飽情不關問爾饑飽果不關有魚落口餐不餐

廿四日消寒第五集與子卿補之兄自一角山房步至

三味庵

朝光晃眼霧纔蘇  
蘇溪鶯鷓鴣泛滿湖  
碧玉倒含波面活  
青鞵輾藉草根枯  
幾人扶杖平橋外  
一幅寒林蕭寺圖  
知否鄉園行樂地  
廿年我卻未曾孤

生白酒

短水標新望開生  
索價廉宵長聊借  
暖戶小不嫌甜醉  
喜顏能駐斟愁手  
易黏清空杯一色  
斜照月如鎌以紅紙揭其望曰短水生酒江淮則書某日開生

凍豆腐

壹齋集卷十三

六

一夕朔風響  
堅凝水玉膏  
皴如皴石骨  
鬆類發峯糕峯糕見王文恪蘇州志  
有竅湯全孕為羹  
筍或莖直須贊  
三德為爾卻腥臊

醃菜

改席潔杯盤  
冬釐出酒關  
剝蕉心最美  
鏘頰齒為寒  
糝稱花零亂  
儲須日暴乾  
經春味尤俊  
微帶一分酸俗以細切為花

蝦米

白小蔬曾當紅  
蝦米是名春  
經雲確熟幻  
本稻花生脯  
與鮑同腊見急就篇住  
材宜薺作羹  
巢湖撈便得  
不似種香杭

炭壘

炭壘見宋謠  
獸炭之遺教  
吳楚任器為  
圓楯以形貌  
吾鄉制作精  
團結堅若膠  
擣屑成墳壚  
和汁襍酒醅  
鐵范規四圍  
百打不停敲  
須臾忽盪脫  
良壁黓淖淖  
明月蝕未蘇  
墨雲又籠罩  
嚴冬

風颭廳廊店出稍稍熨炭火易灰粟薪濕多爆一丸熱地爐紅  
日驚我覺案温研冰開窗暖檐雀鬧時聽石鈔鳴閒有宣栗炮  
辰燒及申燼晷刻宛相較倘欲遺核留俗以燒及大半爲核但撥深灰窖  
夜坐更可親一任犬吠豹

前年於宋觀察署齋獲觀馬和之二南圖真跡匆遽

未盡審視寒窗追憶僅能仿佛其二三冊因衍爲五字

詩三首希他日再見爲足成之

關雎分三圖乃於一幅併界畫在卽離雲樹爲掩映河洲聚圓  
沙流波綠且淨王雎相和鳴不作凡鳥性后妃德幽閒流苻不  
忘敬僮僮而祗祗將匪漢唐覩敷坐臨河洲想見君子聖其左  
琴瑟張鐘鼓亦端正二人并鼓之色喜若相慶三年見幾忘仿  
佛補篇詠傳箋徒紛綸卽此是毛鄭

壹齋集卷十三

樛木大蔽牛交柯輒千萬葛藟復纍之有若瓜引蔓糾纏上細  
枝屈曲不稍遠一一原可尋筆筆雙鉤健瓊瑤而玉佩下立貌  
恭恣卽木卽妃心贖物興繾綣和風一吹揚萋萋者誰怨

一母將三雛嬌憨小可愛芽苜擷衽閒回顧正相對似憐兒不  
前意欲負之背大者趨且及跳舞喜難耐次亦來玲塢繫絡項  
猶戴唯穉最可人約生纔及睟肌膚冰雪如玉面桃花頰是時  
風俗淳虯也晝不吠女貌頗娟妍定是士人妃正恐多男兒尙  
復有弟妹寒窗一追思宛若我殤在

十二月初九日溪山好處亭消寒第六集同子卿作

先向王家後馬家城陰路熟不愁又溪山好處亭新葺楊柳叢  
中戶慣搥七日再來因六集今年冬景似春華窗晴盡卷筠簾  
坐爐徹毋煩栗炭加喜見沙鷗波浩蕩惜無魚艇艫鷗鴉老颯

棋局分曹睹楚夾詩篇任客誇深綠幾叢諸葛菜淺紅一樹美人茶籬頭麝粟微吹管屋角枇杷細糝花潘陸眾方戀槐柳湖洞我意只兼葭袁安門外惟填雪焦子廬名恰稱瓜偶與諸君共杯酒劇憐無地話桑麻莫辭後會更番醉起壑修蛇要共遮

十日集何漑生憶宅因同馬千之備周最峯德隆王子卿澤程香谷家祥家兄補之游興國庵歸飲漑生草堂

### 四首

幽人隔溪居邀我餞殘臘曲巷開草堂朋簪於此盍倚几光鑿人滑淨明勝蠟倒映畫圖書一一可響揚茶罷思微行蕭寺訪孤衲出門面乍寒耳後風颯颯

望望招提遙行行寒且忍枯枝柳欲穉斷橋水猶引扣關古佛迎面人笑至矧老稚亦欣然延客過關楮煮茗薦冬壑風味勝

臺齋集卷十三

八

燒筍但怪客何閒不知歲華隕

殘陽忽滿地歸鴉飛一天復此草堂坐盤饌羅甘鮮黃雞帶新糟白魚加餠煎胡桃棗栗梨一一飭豆羹怪此肴核豐不類山人筵引杯欲浮君我醉先陶然

初更遽辭去呼渡河之干重裘肌尙粟念此渡子寒賈船狎怡排歸夢應已殘打槳便登岸霜風動微瀾城門闔未遂月照長街寬題詩恐疥壁歸且挑燈看

### 頭風

不是愈無微不至因責少文散誰一字合骨欲五峯分立若屋常矮瘥如酒過醺那堪霜雪滿蒙被臥斜曛

歲暮十詠效范石湖臘月邨田樂府體有序

石湖采田家語得歲暮十事各賦一詩以識土風錢家



蕪湖五世矣閒取歲暮可詠者亦得十事非欲爭勝前  
賢蓋畧寓勸諷之意云爾

掃塵

纔交三九未四九街頭已賣掃塵帚温樓煖室垂流蘇何處飛  
塵到窗牖可憐貧家太偏仄煙薰屋梁如漆黑蒙首反面掃益  
多年年無奈飛塵何我爲吉語君試聽明年掃塵定應勝西風  
吹倒庾元規只上琵琶不生甌

糊窗

初冬糊窗紙易破小兒弄筆墨重泥掃卻烟煤復再糊明月白  
映三更初一爐活火紅似玉生酒甘酸醃菜熟微吟憶昨歸來  
路郵店更深投宿處圭竇新糊滿屋春熒熒燈火寒可親橫糊  
顛倒若有字郵學生幕上大人

蒸年飯

壹齋集卷十三

九

爨婢澆浙竈下忙浮浮深甌豐年香欲熟未熟長腰長攤之風  
地冰雪光除夕奉先眾始嘗食至穀日爲吉祥大家百斛猶不  
足小家升斗珍如玉百斛升斗笑足論但願積穀高於門大家  
小家風雪裏歲歲不愁年飯米

發檄

豬頭爛熟夜未央銅盤難燭爐炷香斗米插秤縣鏡光芳尊桂  
酒三獻觴朱衣綠緣金龍驤發檄道士來伏章上自通明殿上  
之玉皇下自田頭廟裏之五猖雷車風馬雜沓紛回翔都來饗  
此嘉薦芳主人拜禱道士起前導雙鑼鳴不已口呼手擊百鬼  
逃徧索庖廚及牀第少安須臾開財門磔雞瀝血淋酒尊搃金  
爆竹然火盆一家喜氣烘朝暎索室敲疫周禮存以發檄名何

無根取此義豈通鬼神土風久遠誰堪論

燒年紙

火盆張王中堂皇膈膈膊柏子香三牲酒醴肥甘芳籠燈列  
炬紛兩行主人跪前子婦後暗祝無聲各在口南走交廣北幽  
燕利市三倍多得錢大兒科第若摘髻小兒力田多逢年更願  
主妻賢不妨買妾兼得百束布區區牲醴辦亦易準擬明年拜  
神賜徹筵焚帛奠酒獎紙灰飛舞檐風狂一聲爆竹神已送主  
人醉飽酣入寢

安樂菜

五辛盤昔供新春易名安樂除夕陳葫蘆紅腐乾白細剉芹  
筍千絲勻屑薑糝鹽錯襍燭亦有人家呼八寶今年安樂勝去  
年明年更比今年好豬羊濁膩雞魚腥老夫愛此風味清尋常  
咄嗟亦可辦况專節物稱嘉名燈前兒女爭嘖饞奴誰向陶  
盤內人生安樂慎勿忘願爾年年啖此菜

壓歲錢

華堂貼地鋪氈能青紅炫眼羣兒趨辭年壓歲錢互送青銅鏤  
鏤衣襪重硯童竈妾紛滿前紙包三寸糊且堅得錢商榷作何  
用卻崇新年博場闌南鄰有客昔奢華當頭今少重茅遮築臺  
避債不可避那有餘錢兒壓歲

接竈

在昔汴京傳故事醉司命當臘廿四如何有送卻無迎吾鄉除  
夕此禮行分歲酒闌來接竈淨掃庖廚熟紙爆城中總總十萬  
家何人可荅明神勞脆錫粉餌香且甘騎旌放惡靈歸龕善降  
百祥不善殃讒口底畏三彭三

封門

除夕之夜三更纔滿城爆竹轟春雷家封門向門拜炷香燒  
紙臨官街此門一閉萬事了坐待明年明日曉親知問遺絕不  
通一年利市君毋擾東家索逋方媢罵雖有雙扉封未服旁人  
借問罵者誰昨日綺羅紈袴兒百金買笑千金擲如水年華去  
不惜父母嘆恨妻孥愁今夜歸來歸不得債家出門兒入門父  
母切齒聲且吞草草關門偷睡去明年負債還如故

贈鼠嫁

守歲女兒聚深夜插花餅餌贈鼠嫁高拋牀頂祝鼠知今日狸  
奴且休怕河間姘女工數錢汝齒窳窳驚我眠得非有女在汝  
穴安得此聲畧無別世人嫁女重錢刀白玉條脫金步搖傾困  
倒廩不稱意賣却良田換珠翠兒今贈嫁何太廉區區得不畏

鼠嫌兒云贈嫁何足數要祈生女嘗如鼠

壹齋集卷十三

十一

立春日消寒七集效香山何處春先到五首

何處春先到江干八角亭霜空征雁度帆下旅人醒揚子千堆  
雪匡廬九疊屏歸舟此時泊風浪幸平甯

何處春先到山顛一覽亭五更烟未泮萬瓦繆誰醒湖拭青銅  
鏡江橫素紙屏寺僧寒未起檐鐸語丁甯

何處春先到城東臆日亭鞭春門夜啟送喜鵲朝醒屬吏趨衙  
鼓歌筵擁肉屏那知寒到鄰卓帽正如甯

何處春先到吳波舊有亭勝遊當日事買醉幾人醒想像存詩  
卷描摹上畫屏如何一池水曾浣阮懷甯

吳波亭舊在西湖池  
旁有明阮大鍼別業

今并廢往尚有阮  
氏子孫收其房繕  
何處春先到溪山好處亭客如鷗鳥狎狂似次公醒聽雪依長

檻題詩刻短屏辛盤簇生菜百福一壺甯是日嘗福橘酒

廿四日先大夫先宜人影前泣賦

父母棄我去三十有八年警欵杳不聞顏貌亦邈然歲時賴影存敬謹中堂懸奉觴思上壽欲語無由緣諸兒未及見無感於目前幼者自嬉笑長者畧致虔那知我心哀脈脈不能宣生兒望名成名成親沒焉負米僅為身盤饌徒甘鮮曾見口一匙曾見饗一盞依然飽兒孫冷落香爐烟我家從祖父九十齒牙堅家居不扶杖日出猶安眠兒孫紛滿目樂事天倫全我獨何罪辜不孝終此天惟餘影上顏不變如其先始知懼衰老終勝長棄捐再拜奠酒漿忍淚燒紙錢

芟梅

山房八本梅夾道兩行植高柯夏敷陰相交密如織低枝蘊其

壹齋集卷十三

三

下屈曲頗畏偏雨露不霑濡枯死若荆棘及冬鼓嚴颶摩盪勁有力落我好花枝摧殘乃家賊我時翫前楹斧斫呼童亟槎枒棄如遺橫斜始自得本非連理枝安有交讓德君子與小人此通彼卽塞况復相混淆幾不辨白黑賢奸一襍處何以申黜陟所以古帝舜詢咎先竄殛敬告御史臺邪枉曷彈劾

胡孝婦

夥有孝婦許夫胡孝廉上京應進士舉翁病醫藥不能愈婦代夫割股解一割股泣向天兒肉不足食願翁少延少延待夫還朝進股肉日莫翁霍然解二孝廉歸自京師翁喜且悲執手語孝廉兒歸幾不見兒婦真難為解三翁起樂鄉里康彊二十年乃先孝廉死解四孝廉選池州校官孝婦悲翁死無以承歡時時泣且言孝廉旋亦卒於官解五去年孝婦六十一而歿子子孫孫哭詣鄉

先生徧徵孝婦文或存或不存曷請於 朝旌其門永慰地

下魂六解

歲暮

歲暮何人暇寒家境獨清閒從內子語看引外孫行晚飯烹雙  
鯽醪盡一觥休言無長物詩卷正縱橫

壹齋集卷十四

當塗 黃鉞 左田

古今體詩六十首

戊午  
己未

戊午元旦獨坐

自掃書堂自詠詩家人爛漫倦難支不因兒女青紅換一樣門  
庭冷落時

衝寒犯雪走通翁孤卻梅花貼骨紅直待今朝開笑口忙閒只  
判一宵中

二日賀正途中作

休辭觸霧肩輿早卻勝趨風手板前布襪青鞋思往歲兄先弟  
後賀新年校量已覺吾過分富貴何當命在天饑食寒衣如願  
了未須負郭要閒田

壹齋集卷十四

往六安渡江入裕溪口

十年慣作三春別千里頗爲獨客行宿雨放晴隄樹綠南風徑  
渡浪花輕非貪安穩勞紆曲曾爲閒游受惡驚多謝江神拭明  
鏡垂憐應亦鑒微情

上巳日渡黃陂湖

去年七日渡此湖時久不雨湖水枯菰蒲冒淺一尺餘萬萬白  
鷺來窺魚今年渡湖纔上巳春水迷漫大江似揚帆風日甚暄  
和遙指廬江眼前是今年去年將毋同老夫借鑒當青銅綠波  
白髮已如許浮雲柳絮猶西東臨風扣舷發長嘯湖上羣山迎  
我笑君家亦有萬頃湖曷不回舟去垂釣

舟抵廬江值雨不得登岸

逆風行舟順風住舍舟登陸雨如注奴僕嘆恨我大笑順逆陰

晴非我故天公要宜麥與秧出非其時適當遇譬如前夜雨連  
明昨日黃陂湖未渡卽今安穩繫柳陰猶勝淋漓浹泥漣袴參差  
綠水鳴一羣雪白棠梨花幾樹家居日日戀湖山且當春游未  
歸去卻愁就道鎮匆匆又將穀雨花期悞

晚霽舟中偶成

溼雲解駁日光明乾鵲橋竿作好聲笑我滯留掩卷坐看人次  
第挂帆行久知驟雨不終日始信人閒重晚晴卻恐朝來泥沒  
髀輿丁未免壓肩頰

廬江登陸道中作

平路白波秋水足迸芽黃甲稻包開鶉鴝聲裏肩輿過生怕崇  
朝雨又來

亂山荒蔚水縱橫滑滑泥深不可行我與僕夫若相友駕犁翻  
土事春耕

豌豆花開蝴蝶飛小桃紅謝綠初肥牧兒睡熟斜陽下鴉趁烏  
犍背上歸

三月七日再到六安書院有花竹齋

路近休輿早堂空待日斜冬青凋舊葉月季豔新花自掃當門  
網教除篆壁蝸巡檐如社燕睇罷又成家

城南夏氏書舍看繡毬花

羅浮山下梅花片吹落千邨萬邨徧東君一夜團作毬拋向君  
家小庭院小庭方丈不可堆騰空復幻冰花開我行花下膚生  
粟若有春雪當頭來步欄對翫一時久今歲花期良不負爲語  
主人須好看莫遺顛風撞玉斗

月季花

東坡詩注世  
謂此玫瑰花

山館石闌東，玫瑰花一叢。玲瓏如欲語，綽約不勝風。豔絕月初，上吟孤酒易中誰將紅粉隊來試白頭翁

立夏遣悶

竹翠侵書幌，花紅落酒杯。感時驚立夏，釀雨欲迎梅。萼熟來黃鳥，庭荒生綠苔。塵容日憔悴，搔首重低徊。

歸雲猶木末，落日已簾鉤。客久便孤詠，山深憚獨遊。揚雲空好古，王粲屢登樓。老去愁何益，時乎不可留。

客散

客散戶初闔，檐昏星尚稀。晚風忽東至，歸鳥必西飛。叢竹孤燈，映虛窗一榻。依誰言非老宿，但未著僧衣。

聽客談水晶庵之勝欲往

近州多野寺，佳境在西南。客有曾遊者，閒來就我談。擬乘竹兜

臺齋集卷十四

三

子徑到水晶庵，避暑過三伏。題詩寄一龕。

竹密

竹密仍求種，花稀更炷香。殘鶯娛客枕，初日下西牆。思臘遊山屐，誰攜古錦囊。閒房太牢落，何處覓滄浪。

米盡戲題

米盡齋廚鼠亦亡，枵然頗稱腹如囊。平生剩讀淮南訓，檢點曾無辟穀方。

黃烈婦

烈婦姓楊氏，六安黃。

裳喬繼室也。

裳喬

以縣丞試用湖

北教匪之亂，上官檄辦荆州軍需，以勞卒烈婦聞之，卽

日自經

吾宗有烈婦，殉節在荆門。夫以賢勞死，身胡涕淚存。萑苻猶喘



息江漢各聲吞丹旒歸來日清詞慰旅魂

四月廿一日雨

林寂鳥無聲瓦響雨有力須臾檐溜通黉淡窗雲黑攬衣涼意  
侵隱几飛點偏已欣除鬱蒸兼可慰無食我來夏欲半需澤今  
始值荷鉏愧不能勸耕非所職竊聞民訛言畏有竄入賊裏壯  
表自堅風雷浪潛息帶犢乃澆風未煩號令亟快茲三寸膏活  
此六安國

食紫豆菜甚甘滑徵其狀爾雅蔞蔞繁露也移種庭院

竝爲此詩

杏葉肥經雨蓴絲滑溜匙徵材煩雅學移種當園蔞籬落尋常  
蔓瓊珠大小垂燕支原自好惜不駐顏衰

本草綱目亦名胡燕支

命酒二篇

壹齋集卷十四

四

命酒不能醉煩懷何日開三閒有花竹千里少樓臺厭入帶牛  
俗誰爲化蜀才楚氛聞已靖好待雁飛回  
賈誼治安策劉蕡下第文非徒長太息祇是欲忠君直道古如  
此斯人今尙聞科名偶然耳底用附青雲

喻生

心芬

讀書龍穴山致山泉一瓶卽張又新所稱第

十泉也詩以報之

喻君讀書龍穴山遠致龍淵水一斛倒寫餅罌戒勿傾怕有驪  
珠孕寒玉是淵張公之所家絳紗塵戰驅蟲沙至今浙奠尙浮  
出龍宮豈亦炊胡麻

往有管箕浮出水上

美哉此水一泓碧萬井霑濡曾

不惜一杯灌溉到小生未免爲霖損涓滴手傾石鉢親候湯潑  
茶危坐始敢嘗榮泉沈碣畧仿佛竹風蕭颯生清涼又新次第  
本不經深江何處求中冷我送此詩君試讀宵分定有老龍聽

雨中臥病

時轉應敬  
敷書院聘

漫浪閒愁不可支，  
鸞醒都付枕中緘。  
疎簾清簟臥聽雨，  
酒醺魚肥病忍饒。  
時有以惠泉酒醉鮓魚遠餉者  
事類量移留代替身，  
如苑繫合空嵌。  
三日會須倚杖迎江寺，  
極目長風送遠帆。

舒城道中

紛紛鷺鴨鬧陂塘，  
疊疊青山映夕陽。  
孤負當年李檢法，  
淡烟疏柳寫山莊。

中丞夫子謝雨散福招集菜根香次韻

藜莧饑腸習已堪，  
濫饗靈享福苑覃。  
龍山北望猶披帽，  
鶴柴西偏暫脫簪。  
特啓園扉通竹轡，  
旋看林翠溼茶籃。  
辭歸鼓腹書堂坐，  
又聽笙鐘萬谷酣。  
晚復大雨

金葉山仿東坡危危日畫貓

壹齋集卷十四

五

嘉慶三年秋九月廿一日其日逢危危畫貓仿坡筆坡肯以墨

爲元豐歲在四

集韻讀若悉

卑服伺青蛙虎文而白質相傳可辟鼠

不言所自出

東坡畫於元豐四年六月九日自題云相傳危危日畫貓可以辟鼠  
畫歸錢侍郎

題詩曾挂室未審釋石軒今日爲藏佚湖山小雨晴偶就葉山

述欣然爲背臨淺色神愈溢卷歸嚇真貓瞥見已逃逸卻恐懶

游堂夜半雷瓦疾

悼梅根

我欲冠無本人皆惜蔡京空餘詩一帙已證有三生經閣芳塵積  
庵門夜月清孺豪題墓碣老淚落縱橫

九蓮洞

在繁昌一名張磯山

朋遊三華山路訪九蓮洞山樓勢嵌空風磴陟躡躡古佛身半  
苔老僧衲全縫旁龕窈窕珠冠聳金鳳云爲張祖姑時有毗

薦貢洞門寬容人夏簟涼可寢其深造未能有几榻是供

凡石榻今不可入息慵養腰脚偷闕笑僕從惜哉江流遠不得欄檻弄

汀洲互掩重風帆亂飛送行當壯觀疊暖覺衣裘重輝輝陽氣

浮去去步姑縱

十月廿四日舟過楊家沙謝潛齋遊三華山同人繪

圖分韻得冠半二字

招客游皖城拏舟纜江岸南風忽見留吹客不令散已申洲渚

言復動巖壑翫三華翠撲人一葦江共亂孤危髻高撐娟若童

未冠霜林抱經樓斑駁錦衣爛入門韻清瑤脩竹不可算徘徊

翫壁畫令我憶可粲

寺僧舍光能詩畫今靈石亭尚存墨竹

齋廚炊午烟山僧設食案對茲秀可餐既飽行且歎吾生行有

涯開歲百年半買山苦無資周何欲難斷思學愚公愚真成漫

壹齋集卷十四

六

郎漫斜陽遠催歸好景形屢換合并近頗難茲游足佳觀回舟

語葉山吹燈寫行看

羅刹磯

惡風白浪倉黃過斜日輕帆子細看海嶽硯山饒洞壑永嘉江

嶼壯波瀾讀書臺久成蘭若乞食僧唯棹雪寒大扁我舸飛鳥

疾何人此地辦漁竿

池州江上乘雪帆風至大通

天耶水耶空復空我乘空氣游其中不知此身化何物襍揉雪

汁相和融輕蘿不動寒無風帆槩詎敢貪天功與波上下聲影

息此時呼吸蛟龍通圍爐命酒生暖熱驚雁飛鳧互明滅雲中

九子應笑人篷上十年重載雪

已亥訪慶觀察微茫暑辨荷葉玉歸曾此遇雪

洲須與雪止帆亦收前來繫船在何處但見疏林作瓊樹

風雪阻舟銅陵胭脂夾三日

最厭風帆之字行船如宥器滿將傾長年忽打回帆鼓依舊寒江鏡面平

黃蘆斫盡剩枯荻猶有饑鳥啄雪來我亦江湖休倦翮歲寒專爲哺雛回

夜雪書懷

兩雪竟十日溪亭嬾一游不關無酒伴猶怯阻風舟歲已崢嶸暮梅應爛漫休寒燈閉門早散帙夜窗幽

龍鍾四十九漫說抱孫遲博得樽前笑難堪鏡裏絲衰慵愁作客身世盡於詩婚嫁成何事名山肯後期

寄少民郡城

昨朝兩兄至說汝小除歸試席硯應凍寒窗火必微經書如日

壹齋集卷十四

七

月文字借光輝守歲還相待趨庭慎莫違

除夕

是日立春

婆娑子夜傾尊醉狼藉辛盤滿屋春卉載何曾扁戶坐來朝已是杖家人劇憐兒輩催吾老未辨溪山置此身祭罷詩篇商甲乙自排卷帙起壬辰

己未元旦

爆竹出行罷聽雞待旦遲重襲除夜燭細改去年詩繞膝兒爭拜過頭杖好持盆梅得春氣紅萼漸紛披

四日自先墓歸途中口占

雪霽陂塘寒水綠日高松檜曉烟清田夫未起柴關閉我已肩輿十里行

一日復一日二首寄荅太宰夫子

一日復一日齷齪憂饑寒遭逢 堯舜世胡爲不之官况奉先  
生召而乃久盤桓共啜已卽誅顛夭復峩冠雖無雞犬效敢忘  
歌伐檀可憐信天翁翹首湖之干由來五十年未肯求魚餐饑  
寒縱弗恤誰禁妻孥歎捨挈兩不可此心將焉安踟躕搔白首  
花落春風殘

一日復一日但覺衰白增七年作山長所至多良朋諸生相因  
依千里常擔簦披吟夜繼日大勝閒倅丞主者苟有意可令文  
教興不知移之民果有此效能我昨官戶曹畫諾公堂升五曹  
經不通度支知何曾旅進而旅退誰解相讓扔鳧短鶴則長易  
之悲填膺卽令勉從仕闕冗何以勝疏慵甘自棄賢儁方同登  
錦幪駑駘懼鞭策難驪騰

雨中牡丹

壹齋集卷十四

八

稱得雪屏繡幕遮阿嬌金屋貯非奢最宜暖藹蘭膏蕪叵耐空  
濛穀雨斜絳雪嶸山消沈瀼瓊珠碧解擁朝霞嫣紅柔綠知多  
少除卻禮姿不是花

青飢飯

俗稱烏飯

法本登真祕今惟浴佛供青精名自好烏飯俗姑從炊藉松烟  
熟蒸成菰米濃鬢絲如可黑輒嚼便衰慵

雨集湖亭貽交園二十四韻

山雨千絲暗湖波百畝寬漸霏隔樹澆澆漲平瀾傾蓋看新  
綠安瓶供牡丹緜青書帶澗粉白繡毬團聽鳥傷春暮懷人情  
癯殘百年才鼎鼎一別竟漫漫謂冬邨春園感歎交游少因衰學道  
難無端傳逸翰相促理征鞍巢鳥殊懷越池蛙不羨官醫師收  
馬敦安邑致豬肝豈暇稽生嬾誰憐范叔寒鶯花聊慰藉亭館

暫盤桓剩有青門侶同欵白髮冠殷勤筵燭燼勸勉酒杯乾勿  
翳深林葉須回大海瀾

聖人方側席上將正登壇出納資司庾趨蹌好握蘭窮愁無藥  
療歲月有時殫乍聽顏為汗徐思鼻更酸纏綿絲自縛宛轉冀

推九詎敢排雲叫終難吸露餐虛名真畫餅至樂只漁竿此去  
如捫籥輸君獨考槃休忘風浪急蓑笠待江干

感事

禍福由來召有門雷霆擊物敢稱冤老糴入室熙甯亂軋學生  
兒天寶昏豈有明神猶誕降大都妖孽偶游魂稷狐社鼠紛逃

匿六幕清明奉泰元

題施廣文履祥遺集

憶就戴崇學君猶及老成為吟先子句具見古人情廣文從先侍御身戴

壹齋集卷十四 九

孟岑先生游猶記先大人樓字韻詩學舍如舟小山城入夏清如何隔年別遽爾

昧平生

剩有黃編在誰令阿買書何妨襍蠹蚓猶勝注蟲魚投老羶難

暖思歸俸少餘長吟對江水脈脈獨愁余君居裕溪無子以姪為後

櫻桃樹下

賺山甜雪宵凝酥絞絲搓碧懸瓊珠江斐漢女弄不得黃鸝一

笑紅模糊迴廊晝靜天宇碧照水流霞射瑤席蕙蘭花老牡丹

殘濃注歌唇向誰惜綠衣暖謝玫瑰甕容珊瑚血凍琥珀濃可

憐南風新入夏無數疏星露林鐘

有感

池上柴關晝不開深林烏嘯勝歌臺不應百舌黃鸝隊偏有烏

鳶聒耳來

繁花落盡草如烟夏始春餘四月天蒼耳未深叢棘短青青也  
自賺人憐

立秋日送楊培曾歸六安

楊君送我行獨命千里駕我行未有期君別胡爲仁記君渡江  
來梅炎初藻夏君今辭我歸黃姑已專夜是日濡滯不自知轉  
惜征鞍跨我豈有所須我豈爲誰嚇稷高方盈廷良樂正執靶  
何戈力未堪度支考書下公然偷太倉見人得毋怕以此久慚  
惡意欲老桑柘前年客淮南去歲棲江舍情爲成連移行迫列  
子嫁浮生能幾何救死不自暇君來佐清歡君去誰慰藉念君  
好兄弟書牀梓陰而新涼入疋櫺風燈互低亞三冬讀有餘一  
戰完可霸蕭蕭竹幾窠潭潭屋五架悠悠我之思冉冉君裝卸  
爲我語故人鬢髮已全化

壹齋集卷十四

十

買舟江上阻風曹歸留示初民兄弟

嘉慶四年冬子月月之望買舟徂京師阻風大江上已發行復  
歸暫與妻孥傷衰疾重別離數月懷不暢艱苦成此行鬱轡心  
愴恨我有終身憂親柩殯未葬五男娶其長仲叔期已曠食指  
百四十甌石誰見餉仕果療貧乎愁心實難放念我年廿三出  
門游甚壯胡爲老將至瑟縮反無狀自是意氣頗敢託高尙  
思彼古之人曠達齊得喪敗絮擁亦佳不作泣相向緘愁酷一  
壺共祝行無恙醉吟付諸兒且當驪歌唱

琉璃河

曉起掀帷耐雪寒琉璃河上一憑闌鴛鴦好在頭應白禁得征  
人七度看

己未除夕與王孝廉澤吳駕部兆棟守歲準提庵次孝

廉舊窈軒四首

旅居忘却在京華對酒高歌三親家饑歲憶開花下讌謂孝看廉

雲怯上雪中車謂駕部一彈指頃新年到再寫圖成舊窈加醉把

茅庵當池館疏林依約水之涯

不須吉語帖黏楹三宿難忘桑下情佛屋經寮陳迹在山門石

徑昔遊更蔚藍天昨瞻廿三日蒙召對養心雲日蟣蝨臣蒙記姓名問汝到

殿在藩邸卽知汝更荷京寓何處臣絨温綸詢住址微禽猶戀舊巢鳴問汝到

尙遲手板下風趨且倒屠蘇酒一壺客底親情良不惡眼前風

景易爲摹重來寢更慵聽鑰遁去心原怕濫竽骨相虞翻知太

薄散人只合在江湖

移銚細撥火爐開佳茗清甘勝酸醅四海競傳虛席詔諸君

誰是出羣才兵消喜見天顏溢雪霽春從地角回說與于湖

詩酒伴放懷好共醉江梅

壹齋集卷十四

十一



壹齋集卷十五

當塗 黃 鉞 左田

古今體詩五十七首 盡庚申一年

題張 若采 同年清溪別意圖卽送之官鎮番

七年聚散類搏沙京輦重逢感鬢華惜別追圖牛女夕居貧久  
悉馬卿家籌邊上策先論將按部行春要種花好待蒲桃新釀  
熟西風涼迎碧油車

三月十五日南苑迎 駕歸宿北紅門外農家口號

茅檐仁見杏花苞三月餘寒色未嬌歇馬煎茶靜相對不孤春  
意只今朝

新畚地瘠種須灰活水春融綠似醅我本頭銜屬民部願克使  
者稻田來

壹齋集卷十五

野闊宵深萬籟通一株楊柳一株風不須慙馬枯筭斲已覺帆  
飛急雨中

過草橋乾隆甲午修禊處時曹員外 祝齡 適屬 鉞補圖  
感而作此

小橋不改水粼粼依舊西華筆可皴不信卅年一俯仰羊劉俱  
作白頭人 爾時曹年廿七鉞年廿四

車過清泛園亭臺布置迥非昔游

淺水菰蒲一尺強香茅亭子水中央而今一例青紅潤不是當  
年舊酒場

喜雨歌次司農夫子韻

香山賀雨歌短歌以詩爲諫鳴元和我

皇德動上天鑿蛟龍不敢蟠泥沙昨宵風雲一時會太液萬頃

軒新波重勞

天步事祈報頌且恐後規則那司農元老率先作臚陳 渥澤  
如星羅滌瑕蕩垢疏不失詔獄悉本人情科書生狂愚效忠直  
手削尺牘千言多少見多怪一笑釋竝不知馬安知駝十行  
手詔特曠蕩萬里涕淚應湧沱同官偏善竊私喜白圭此日還  
君嗟臯夔賡唱互感泣鼓舞草木皆婆娑赦過宥罪雷雨解此  
理至切非私阿天瓢更請再傾倒玉壺準備齎金犧

望雨歌再次前韻

天螻夜出蚯蚓歌地氣已動陰陽和一旬不雨土又燥千車所  
碾風揚沙坐後雲豕渡銀漢卻見月兔舒金波越有大旱記小  
正古亦重請知無那刑鴉下策重違俗燒燕五百誰教羅神龍  
按部想未到自近而遠聊殊科昨朝有客鄉國至今春好兩江

壹齋集卷十五

二

南多麥秋已至禾已插枯藉所積高埋駝我雖無田聽亦樂全  
家况在江之沱仰天高歌動星斗玉女一粲流光嗟來朝不辭  
冒雨入泥泥泥行婆娑南齋潑茗靜相對飛雷四注傾松阿  
右壇大報百神饗

天顏喜溢流山穢

題周忠介公畫蘭竹

畫作於天啓二年穀雨前自題云  
古墨濃磨寫竹蘭幽姿澹絕染毫

難最嫌脂粉滿塵市  
不爲逢時畫牡丹

濃寫孤筠澹寫蘭自憐幽絕入時難那知穀雨春猶好已把茄  
花當牡丹

後喜雨歌三次前韻

僕夫滙行唱且歌九衢一再嫉甘和車帷閉置偶罇漏濺面時  
復驚泥沙三農萬井滿慰望挽犂趨澤呼天波剪與根莖仰膏

潤淋漓枝葉低阿那幽風縮本我能畫瓜壺茅屋胸中羅牆根  
老桑遠宜伐門前穉柳濃須科九秋讎斂行可必一雨樂事何  
其多况聞西師大擊賊尅日載實馳歸駝消洗戰恤刮刀劍蕩  
滌穢惡蘇潛沈須知醞釀自誠懇點滴玉粒麝牙嗟我隸農官  
十餘載鬢髮早白形婆娑杜陵糧粒或自保亦願歸種青山阿  
溝中之材已自棄青黃不稱爲尊儀

五日憶昔遊

荆山大小排青螺歐湖一碧明鏡磨游船客舫棄不顧孤此十  
頃琉璃波去年端陽泛舟入雲水空濛拍天溼苔花繡壁翠模  
糊鷗鷺驚人雪飄集筆牀茶竈置船頭賦詩作畫揚清謳兩山  
之間開篙舸與波不競相夷猶仙覓化去題名刺五百年來無  
此樂想像紅亭枕水心參差碧浪排山脚

國初尙有朱氏歸園見蕭尺木詩集歸

壹齋集卷十五

三

途燈火河橋暮咫尺珠簾隔烟霧脆管哀絲懔恍來翠眉蟬鬢  
依稀遇由來喧靜不相干照眼花枝轉眼殘已分心腸如木石  
不得蚊聚換沙搏一從隔歲來京輦紅塵日踏東華輦下直閒  
房記昨游驚心節物懷難遺蹉跎五十鬢鬚蒼刺有湖山夢不  
忘卻笑韓公愛高爵不教張籍守江鄉

五日章戶部

運標

邀食子鶯戲作

節物隨地殊鄉味因俗好端陽古烹鶯刑鶯阿誰導于湖此風  
盛饌養在豚菹十戶九有籠陂塘逞頑傲至日盡殺之不暇留  
警盜章君舉鄉風湯燻相慰勞一任江淹貪不學庾悅嫪我飽  
更有懷當筵發悔懊冰鱗胡蒜烹銀鱗紅莧芼蒲酒醉氤氳榴  
花洗昏眊

蕪湖五日俗以榴花置杯中洗目而棄之道謂之送火眼

爲君數家珍何物致

行竈鶯乎倘有知得毋怨陵暴在遠獨不遺此因胡爲造一笑

日當頭我僕車已膏揮手賦老饕請以不殺報

文信國琴圖次司農夫子韻

並序

琴藏閩縣李瓊宴家王明府

紹蘭

攜其圖來京師信國

自題云松風一榻雨瀟瀟萬里封疆不寂寥獨坐瑤琴  
遺世慮君恩猶恐壯懷消時景炎元年蒙恩遣問召入  
夜宿青原寺感懷之作譜於琴中識之文山按公以德  
祐二年奉旨詣北軍議和爲伯顏所拘脅之北行至京  
口遁走眞州歷揚州高郵泰通復遵海而南至台温危  
急存亡在於呼吸公所賦十六難詩可見也夏五月益  
王登極福安改元景炎以觀文殿學士侍讀召赴行在  
琴所識蒙恩遣問召入者益指是時也第公自德祐二  
年正月至夏五改元實未嘗歸江西明年丁丑五月始  
引兵自梅嶺出復吉贛諸縣臨洪袁瑞皆響應則元年  
不應有夜宿青原之事公集亦無此詩指南集杜諸錄  
皆公手著當可據也然忠臣手澤爲世愛傳不敢遽以  
爲贗謹疏其事如此以待博雅考證云

壹齋集卷十五

四

眞州夜走哨角哀商聲激裂隳三台十生九死航海免囊琴何  
處從公來景炎夏五赴特召偃蹇閩嶠思規恢宜中世傑不專  
壹空坑失利長城摧是時斯琴落誰手愛護焦尾離燹災黃龍  
海底抱赤日白晝壁上轟春雷回頭蕭寺寫風雨怒濤駭浪紛  
喧愆憶公少年盛聲伎貶損斷自初掄魁樂人之樂死人事從  
容柴市無徂徠廣陵雖絕碧玉軫畫圖猶播黃金臺絲履玉帶  
不我見對此亦欲陳尊壘能邀丞相一撫弄偉哉此木眞奇才

漫興二首

人澤烏臺簡家橫玉帳經乃心捫果赤死骨色猶青聚米夫何  
易流言不可聽喧啾紛葢菑掃蕩待風霆

孺子師黃石山人蒼白衣談仙翰大畧辟穀避危機豈有如魚  
契翻恩控鶴飛天都足官府恐被上真譏

直歸遇雨柬趙孝廉

萬隆

墨雲黥慘雷碎鋒雨點欲碎玻璃窗車帷閉置目無見泥塗軒  
輕波翻江依稀出城石瑩確隱約入市人喧唳尋常三刻已到  
舍今乃百里凌崕崦跣跌閉目偶存想看雨何必搖吳艤紗窗  
竹簾轎中坐草鞋箬帽雙丁扛雲山滿眼學高米雨氣蒼草莽  
蘭汪溪堂有客隱烏几邨醪爲我傾雞缸長街洗淨白石滑往  
往歸路疎鐘撞蹢跚下車再三嘆忘憂耽樂何其翫方今西南  
正殺賊壯士冒雨揮矛鏃蟲蛆生背蟻生甲模糊血刃汗麾幢

壹齋集卷十五

五

西清囊筆有餘幸盾鼻磨墨將毋雙牀牀屋漏睡不穩起親几  
硯燒油缸不文不武仁義蝨急投手板歸耕耰東田咫尺約吾  
友野航一繫垂楊橋

趙別字  
東田

中元夜雨

的的蒿燈大道傍光明爭澈九幽藏願將億萬青蓮朵燃向西  
南照國殤

京師中元夜采蒿一枝上綴香數十百枝插於通街  
謂之蒿鏗江南中元結盂蘭會者以紙爲荷燈浮於

江河動以  
數百盞

夜起

夢驚白雨點狂灑窗不歇醒聞鄰櫩聲身浸一牀月秋霖出入  
愁宵眠亦餽飢涼颼引徐徐漸欲侵肌骨推枕聽雞鳴目送天  
河沒驅車入泥塗何時免鞦韆

東田見和前篇還有浩然之志因呈此作

胸無太元口無鳳牢愁不復揚雲夢記事無心更覓珠益智誰  
人解貽糗行年五十精銷亡壯不如人老焉用惟餘歸興比山  
濃叵耐羈懷與詩闕達官苦語最厭聽客子窮途暫交慟君年  
舞勺美且都已有才名過屈宋隱霧時窺赤豹斑排雲會見天  
門玃那知蹭蹬三十年猶遲春官領鄉貢鴻前磨後五色章翦  
翎卻向籠中送我亦捉將官裏來入袋胡痴如入甕舉案頻懷  
廡下光避兄真學於陵仲眼前諸子共我長鄰上嬌孫何日弄  
捐佩思從楚客游伐檀不待詩人諷久甘紉布老于家誰耐輕  
肥日糜俸許身稷契大有人放歸田里猶能種君須雖白顏未  
衰時清正要王褒頌鵷雛鼠彼何知健鶻陵空拳易中得意  
終看一日花勸君且忍三冬凍前言戲耳約始徐秋月當頭飲  
須痛莫嫌會面素心稀人三自古文爲眾謂子

壹齋集卷十五

六

宋人畫盧仝煮茶圖

五竿翠竹疏有風閒廁三本芭蕉紅玉川攢眉手團扇茶鼎卓  
立山玲瓏一奴擷衣提一器一婢捧盃旁鞠躬長須赤腳老無  
齒一一貌取韓詩工惜乎不畫李花一兩樹照我明月茅屋東  
意思慘淡神未克得毋軍校驚周公石鼎乍沸蚓竅通茶香詩  
興交相攻發爲月蝕蝨賊訐添丁之讖終何凶可憐蟻蝨臣盧  
仝黃金鑄淚陳孤忠少無往還歌異同老而治經究始終突如  
灰如眞寢寢試吟樓上女兒曲豈是煎茶禿鬢翁

宋孝女

五十一

漢陽孝女朱謂是徽國文公族及笄父歿母病篤女日夕不離  
側曰我手母手足母足奈何母獨不仁何以報我獨一母起兒  
起母眠兒眠與母同一身寒暑十數年母歸黃泉不得見兒惟

不嫁日夕從影前二解兄弟不能奪親戚不相聞至今三十年惟  
有畫史傳其真左椿右萱永慕存吁嗟孝女終其身三解凡今之  
人父喪有不歸母病猶倚閭謂彼非丈夫亦誦詩而讀書嗚呼  
曷不視此孝女朱四解

九月四日司農夫子招游極樂寺

入都將一歲出郭始今晨遠挹西山翠濃如北苑皴風驅車得  
得橋送水鱗鱗共指招提近平原有憩輪

高樹擁山門沙田茁稻孫登渠泉一綫宿室菊千盆古塔人爭

上燧碑薛獨捫重修寺碑巖分宜爲暨太監作西風催落日選地布芳尊

小亭纔似笠林密葉周遮柿認千頭橘楓當四面花窗虛便坐  
客石穩待煎茶只欠欄干外激泓水一涯

送東田歸當塗

壹齋集卷十五

七

公車方與計吏偕先生翻然歸去來覓官紛紛走折趾先生掉  
頭輒掩耳問胡欲歸急如此茅屋青山癡魂裏先生薄有田幾  
塍到家樂事言頗能烏溪木棉載晴雪黃池藕粉凝秋冰今年  
水大圩未破晚禾猶可收黃稔呼兒斲酒與共嘗仰屋高歌屬  
誰和我與先生生同庚鉞與東田俱庚午生髮白難與流光爭以詩慰留  
留忽行觸我無限鄉思縈兒婚未畢孫又生卻恨無屋編柴荆  
若可家食貧亦清況有兒子詩書聲人生何必希公卿立冬五  
日冬已成敗葉雨墮堆前楹柴車夜半隨鴻征正我入直趨巖  
更車中行行定相笑彼不歸者非人情

九月廿六日五鼓大雪入直

天上清高冷不禁飛糞一夜玉階淡不知犯曉誰先到已有瓊

瑤跡可尋

馬遠園亭雪霽

森森千丈松曲曲數間屋一亭四方高上戴三寸玉濃墨畫窗  
楞縱橫界棊局想見製作精柴桷甚樸屬中有向火人頭裹巾  
一幅凌兢蹲小僮縮項寒可掬不知何客來騎馬尾一僕琴酒  
兩無將何以慰適軸得毋山之阿梅花正芬馥我初展畫時寒  
色炫兩目心疑馬欽山筆墨差仿彿山根得遠名雙鉤畧可讀  
儼如捫題名尚帶苔蘚綠移我鄉園情玩雪湖山曲一角山房  
中圍爐郝曾促

謂馬千  
之宅

易元吉子母戲貓圖

小時變畜貓頗有張搏癖以物觸其雛使之自騰擲於今老去  
心猶童買魚聘取蕭齋中堆綿榻絮軟無骨玲嶸几榻肥而豐  
朝來看畫開古幃畫耶真耶倩誰定女貓毛色白勝雪舌舐么

壺齋集卷十五

八

雛儂繡甃其右一雄尾直豎屈爪招雛雛仰顧一雛卑伏母甃  
空白質豹文闐然露其餘三貓頭聚頭一黑二白若有求諦觀  
黑者銜蜥易跂跂脈脈猶張眸翳濛衣桁羅襦香鼎彝玉案爛  
有光秦姬趙艷渺何所恩雲籠雨留閒房紅椒膩壁錦貼地邢  
有跳梁鼠敢至玉臼朱砂逃守宮卻被狸奴暗相伺可憐蝸寄  
清如此釋畫看貓亦猶是唯防竊齧一牀書仗此雙雛捕鼠子  
物情少好皆可娛意氣所到天機趨寄言忠恕休輕詆義甫人  
貓不可呼

讀書

胸中無限溪山好眼底何人說與知散直歸來寒欲暮吹燈隱  
几獨題詩

李杜文章萬丈光宋元名繪畧相當休憑摸絹知時代補綴朱



繇便弄藏

山色蒼茫樹影濃梅花老衲氣沈雄後來三昧為誰得只有南  
湖白石翁

五年七見山樵蹟此老於吾信有緣爭似雅宜山色好流雲溼

翠特新鮮向見王子蒙友鹿林泉勝集二圖皆絕佳今又見具  
區林屋秀石修篁秋江利涉花溪漁隱雅宜山齋五

頓山齋圖為陳惟寅作  
筆墨尤出此六幘上

五州烟雨不模糊海嶽庵圖跡有無便是化工無定相御於何

處著鉤摹向見米數文海嶽庵圖紙已剝落今  
五州烟雨卷紙墨斬新詢可寶也

鐵榦高松互攫拏欽山宗派自傳家須知畫法通書法界畫渾

如錐畫沙

衡山著意摹希遠赤壁圖成迴軼羣御笑世人多耳鑿強將細

沈配粗文趙伯駒後赤壁圖卷為嚴介溪豪奪衡山為摹此本  
見卷後休承跋俗有粗文細沈之評其實衡山究以

壹齋集卷十五

九

工筆見  
長也

花鳥精神數陸治陳淳不施膠粉妙而真兩君若要論優劣林

壑包山更絕倫

六如高格殊高古皴法分明是李唐伯仲之間視文沈眼中未

必有周郎畫家以居士曾學於周臣  
今觀東邨筆殆不如也

鵲突皴山密點苔強摹董巨澗容臺豈知濃古清蒼筆轉自歌

姬院裏來周傑園讀畫錄謂香光晚年倦於酬應客有求  
其真蹟者納絹素於其姬妾輩得之必大佳

南田花鳥接黃徐閒寫雲林筆亦殊庸史乞靈惟贖稿紛紛依

樣畫壺盧

尺木前身老畫師家山一一貌幽姿可憐亂後荒寒甚但對梅

花畫楚詞蕭尺木初生時其父寢郭忠恕曰吾當為爾子蕭畫  
有太平四十景離騷圖所居曰梅築在今蕪湖縣東

內門

三王合卷贈巢民蕭散虛和學富春頃見秋山紅樹本廉州似  
有捉刀人三王合筆贈巢民卷藏歛吳子華處頃見廉州秋  
山紅樹及樵趙文敏諸本密緻可愛絕似石谷不類

合卷  
筆

骨重神寒天廟器司農畫品足方之山紅澗碧紛無數想見南  
齋吮筆時

水郭江邨境絕清千巖萬壑翠崢嶸耕煙倘入停雲坐定使前  
賢畏後生

王涯書畫初遭厄覆轍流傳到賈嚴寄語癡兒莫豪奪雲烟過  
眼豈能滅

平生愛畫似劉侯千軸江山貯兩眸客若縱觀無不可爲君一  
一細追求

夜坐簡子卿

臺齋集卷十五

十

簾額新蟻畫碧空煎茶火活夜燈紅温經未肯煩裴迪刮目憑  
誰待呂蒙應舉昔曾蕭寺共棄官今已雪泥同沈吟正爾爲君  
故努力看花我欲東

爲朱

錫庚

同年追題竹君夫子椒花吟舫圖次石君夫

子韻

我年二十勤清修先生挈之京華游青山一賦首擊節拔置高  
等空其儔那知九舉始一第青萍出匣亾風歐東軒載拜東坡  
逝滄桑變滅誰能籌竭來清醕亦霜鬢願歸山谷騎石牛披圖  
吟舫昔曾侍雲烟過眼何飄悠藏書插架三萬軸西東四列如  
羅羞椒聊吐芬味清烈合歡筵影枝交樛艸元載酒說許鄭花  
紅布席筵崇邱手開泥封自斟酌點滴不許奚奴偷千觚萬榼  
判賢聖欲以醒醉觀蘭蕙爾時列坐孰先後一一按畫猶堪求

少河家學堂構宵壑茨不用工重鳩題詩述舊感且泣此卷天地應長留

次韻驛柳四首

縹烟織霧幾番晴鞍背船昏到處迎消遣驪駒多少恨招來黃鳥兩三聲怕聽羌笛秋橫月愛趁餽蕭曉入城翠掃成樓題字滅頽垣不辨是何營

憶看新綠染春衣臥水枯槎條十圍叵耐風波維艇住甯甘攀折贈人歸濃陰日午便休暘狂絮天空得暢飛移種靈和應不願魚標酒望儘依依

滿橋回首隔殘陽萬樹迷離失故鄉向夕頻驚邊堠火未秋已隕塞門霜寒條歌送新婚別繫馬人來古戰場枝葉可憐髣欲盡翠鬢雨淚不成行

壹齋集卷十五

十一

婀娜何須說鳳州亭長亭短總含愁門前蕭灑慚陶令江上羈棲憶柳侯爲閩人多常畜眼自憐影瘦每臨流書堂亦有陰淡護搖落西風又九秋

憶大兄時兄有入都之意

潭潭古屋四三層童僕羣依隔院燈歇馬真如投店客聽雞又作打包僧溪山有屨忙都減文酒無緣醉不勝聞道吾兄動游興擬裁布被待姜肱

臘八粥

古臘無定辰禪家用八循名若相蒙疏義偶加察因緣始六師法水去垢坵其徒作粥供故事沿古刹流傳到士夫至日恣飲嚼紅糟與朱砂僧癡而俗黠黃梁秬閒拏紫葍意先拔棗栗胡桃仁前期皮盡刮氤氳一鑑熟臘若髓慙獺旣實中藏虛兼

便衰齒鬢今晨飮天廚澆沃胃神猾將毋詫寒酸何處得甘滑  
恍忽記年時模糊釜頰夏一笑謝譏嘲捫腹命筆札

歲莫雜感再次子卿舊癯軒韻

又對辛盤紀歲華天寒獨客苦思家都將兒女團團寢盡付冰  
霜輓轆車書報平安疑未信愁來努力飯難加百年便是中人  
壽五十流光漸有涯

近市租人屋幾楹十年仕宦久無情守株待兔忘三窟起舞聞  
雞失五更分與漁樵尋活計悔於書畫未逃名劇憐一別貧難  
逐卻把窮愁付阿鳴

心醉神巫競走趨笑他禦寇枉師壺意珠自繫從人指心板如

初儘客摹

元許衡語

頗解山林慣飢餓肯將文史換笙竽得歸卽拜

君王賜敢效知章乞鑑湖

蕪湖縣西有湖亦名鏡湖

壹齋集卷十五

十一

槌几唐花爛漫開暫將懷抱托邨醅謝公雅負蒼生望管子羣  
推天下才身後功名憑位置眼前風景且低回山茨水檻都堪  
憶況有湖邊八本梅

壹齋集卷十六

當塗 黃 鉞 左田

古今體詩三十六首 盡辛酉一年

元日直歸與子卿對酒作

一窗晴日放盆梅急脫朝衫命酒杯朱橘甘酸青子澀莫孤辛  
苦自南來

烏几橫陳七尺寬硯山墨沼襍辛盤下簾何必分南北只作城

旁屋裏看 城旁書屋子卿家齋名

今年邸舍昨僧廬嬉戲真如同隊魚正要兒曹知此樂為君詳

細寫家書 時有客南歸

送程 家祥 秀才 召試孝廉方正歸蕪湖

艸綠瀛洲柳茁芽西山山翠撲征車去當京輦清明節歸及鄉

壹齋集卷十六

園芍藥花徵士心殊憚行役廣文官好補咳華奉觴上壽春猶

盜宅涌江魚不待又 程居臨江上

清明

又感清明節候催紙鳶風暝碧天開斜陽獨立時南望默想諸

兒上冢回

緣埂穿圩簫鼓鳴邨邨擔酒賽清明昨聞米價春來貴多恐羣

毗醉不成

得東田書卻寄

人去賓鴻南書來候雁北眾方萬里搏彼獨六月息惟憂鄉國

饑不說家無食缺斜字幾行乍試病起墨空帷感蚬蟻想見可

憐色 東田時悼公 秋風生何時奮飛至君側

廣甯門外送客作

羈心似馬騎難鞿力與流光相縱送寒食清明兩度過青山白  
紵連宵寢臨水登山記昨年邨桃溪杏曉晴烟千頃菜花黃照  
眼萬株楊柳綠差肩朝來送客南歸路馬頭塵起西山暮不羨  
人今取道歸劇憐我昔從茲去

春夜獨坐憶紫陽夜歸作

入城訪故交飲歸夜將丙經過巷無人閒有燈光隔開門煩老  
兵俗厚宵不警花枝上肩輿清月光出嶺分明巖壁上寫我須  
眉影呼船渡紫陽山峭東風冷遙聞叢竹間書聲正清永

憶六安有花竹齋

觀善堂連敬業堂花南硯北最難忘百竿窗竹經年看幾筍盆  
蘭一月香筆點欄干酬句苦墨濡衫袖揚碑忙當時但覺家園  
好此日尋思並故鄉

壹齋集卷十六

二

合歡花下歌

澄懷園直廬作

碧羅翦葉絨作花千枝萬葉相鬢鬖晝炕宵聶若有覺不比長  
楚矜無家我時臥病正相對香氣郁烈侵窗紗嵇山著論久無  
驗羔妻醞酒誰爲賒人生煩惱皆自取驅使艸木胡爲耶卽如  
此花植此地公卿過眼紛如麻閨人成世復幾輩若者簡策誰  
箏琶兩潘二陸昔森列皆隨槐柳爲枯杈花如有知亦不適何  
暇蠲我閒咨嗟清陰雨濯碧空淨化作翠鳳棲檐牙好風勸我  
且騎去博桑東海看天葩

澄懷園直廬臥病口號

雲路難階骨不僊三生定有惡因緣如何竟作唐公鼠滌胃前  
腸太可憐時病下利

蹠躩騎嘶繞屋過日斜猶聽曳車驟茲坊自有大人住不是梅

生致客多

苦雨述病

六月六日 京師作

一雨竟五日客舍成清溪中堂坐張蓋拳曲如雞棲牆傾見南鄰屋場傳街西可憐祖參軍終日頭常低維時邁厲腊請醫限塗泥種種受苦惡若剝生蟹臍我雖號老饕味不出菜畦逾旬再食肉無故不殺雞南較購筍脯北甕求寒螿要得好滋味重令加鹽醢瓜果絕不嘗冬偶食一梨致病當有因此因真無稽將刀剖我腹刮洗煩金篦坐想乃成癭寢賦歸來兮道逢長桑君授藥纜刀圭入口便霍然仰見紅日躋上堂拜吾兄入宮見吾妻諸兒喜我歸嬌孫索提攜裹回五經塾乾鵲迎人唬家人自今請勿再親輪踈儒冠餓不炊慎勿行自迷檐聲忽驚覺苦雨猶淒淒

壹齋集卷十六

三

子卿吉士與梅孝廉

沖

同館於范鴻臚蓋家吉士齋居

滲漏移榻就孝廉同宿孝廉用

錢

苦雨詩韻嘲之錢亦

和作

竝居得張陸隊魚游一溪朝逐落花食暮各依蒲棲天忽降淫雨流驟分東西一居聽事高一壓頽檐低端居踞几案投足五斗泥如酒判清濁到鬲不到臍相望但枿拱竟爾分眈眈淒淒風雨中不得同聽雞無已移榻具合作一甕壑處內忽處外膾炙淆醬醢居然別甘苦去蕙而進梨子卿齋居後抱郵齋在前中隔主人寢梅仙詩有聲東方雄滑稽書示釋我病如施眼中飽朗吟真快哉善戲非謹兮是日天宇清缺月磨新圭地潮更蒸鬱寢想樓臺躋一燈又枯坐椅妾偕影妻幾回思自効遊歸手分攜鷓鴣向君鳴杜宇隨我唬明年繼王後杏苑馳風蹶或者雲霧窗不怕烟

雨迷高歌蘇病骨日望秋風淒

六月十日乍晴再疊前韻

袞裯上梅綠街衢滙山溪家家見初日各各曝所棲雲過忽霏  
雨救東已失西陰晴凡百變抱坐雙眉低自從改月來推人墮  
溝泥攬衣苦積潤飲水痛繞臍傳聞國四郊迷漫失町畦人家  
水半扉晝寂邨無雞哀鴻聚野廟喫盡僧廚罄以水爲四鄰誰  
乞微生醯

聖慈詔發粟零丁蘇病黎仍命使者出四路勤考稽治水若  
治髮疏爬煩櫛篋分明

天地仁生育父母兮朝來氣疏爽嶙峋淖角圭我欲驅愚公箕  
畚西山躋叩石復墾壤督率京城妻爲我置土石填築相招攜  
大道如砥平柳蔭秋蟬嘯一日奏三捷紅旗飛霜蹶千邨婦子

壺齋集卷十六

四

聚萬竈炊烟迷風雨皆和甘春夏無苦淒

三疊前韻酬抱邨並戲呈子卿

河魚感腹疾岷氣傷太溪素問太溪腎岷氣也未明先眾起啓戶驚鳥棲

力疾弄柔翰塗東而抹西問誰迫之然首爲宣城低一唱再三

和蓮花出汗泥祕思乙乙抽不絕蜘蛛臍遂令病夫病俯仰如

夏畦豈知巨小才分絕魯越雞形謀縱成光難免所思整臂彼

知味人乃善調醢醢詎有脂粉材膏沐塗凍黎王生登玉堂章

組思會稽家慶拜鶴髮閨妝媚鸞篋那管羈旅中叔兮兼伯兮

同牀各聽雨圓璧殊方圭寒山與溫谷是在人所躋唯子獨私

君不異鄒忌妻亦年見頭角已辱相邀攜蘭成名父子英物傳

兒嘒奈何千里足暫絆追風蹶幸賦壯游樂勿令歸客迷吾言

不當聞餘辛多苦淒



子卿偶作山水小幅未竟爲人竊去乞余題詩因爲足成書一絕句仍送子卿和之

邨南邨北翠屏顏豔實妍英滿目斑恍惚十年前過此肩輿箬嶺看黃山

近來畫筆數王蒙大好家山落眼中寄語後人須認取樹頭雲脚是癡翁

### 四疊前韻酬子卿

君材堪薦羞采采遲澗溪十三從吾師謂尹甫兄筆硯神明棲是時

頂尚髡坐我廳之西玉雪眾所愛誦讀頭惟低顧我意氣合有如印抑泥我試京兆歸不學悔噬臍移家住中城陋室同荒畦不謂鳳皇羽學舞從山雜詞章雖小道是非敢相鑿手書坐桑蔭朝暮忘鹽醢辛勤日者學甘若鑽樵梨稍稍出有意不作言

### 壹齋集卷十六

五

無稽時或事棒喝言下參竹篋別離凡幾更備兮而咥兮隘諸敢尸功琢磨由壁圭今年策高第目送金門躋正當命柴車迎取山公妻胡爲憶畫社壺榼朋儕攜君聽春晴鳥詎效寒號呢免魚旣已得何弗忘筌蹠小友流盛名老馬塗自迷去住兩不可病起彌蕭淒

### 又雨

昨日日未出朝霞紅若火今晨雞三號窗黑起不可已徵雨必來霏微耐猶頗須臾又翻盆萬箭急飛筈將毋炙雷車不絕膏流輒不然逃乖龍千載脫囚鎖嗷嗷哀鴻哀戢戢裸蟲裸大哉我

皇恩博濟錢米賒北農飽亦易快嚼餅生裹奈何靳區區絕彼

萬頤朵雨師本至仁乃與

聖心左急爲捲洪波還我塵掘堞寒須種木棉饑可拾瓜果人海同一心哀祈豈惟我

五疊前韻再呈子卿以達前篇未盡之意

吾鄉數詩人青山與姑溪烏江後來秀卜築于湖樓至今有遺跡猶在西城西三君論優劣功甫品較低同人于野亨乃反需于泥李張若狸麝來射緣香齋雄才頗跌宕不復修町畦其後頓寂寞淵淵惟羣雞時文千萬篇旨蓄三冬整紛紛聚蠖蟻滅沒百糶醢詩文豈無集雕刻寃棗梨科名世俗重再請爲君稽翰林何應陶鑄章三花燦釵篋及今四十年粲者得子兮木翁韋別號盛文章久作特達圭兩君上玉堂厯階僅半躋譬彼荀奉若神傷喪厥妻何改主車陶改知縣子才正及鋒卷軸隨身攜官職春林花聲名芳鳥嘯鄉人看花客躑躅林中蹠花飛鳥嘯歎評隲何人迷勉哉志著述無忽風雨淒

壹齋集卷十六

六

咏屋上艸

一番雨過一番青得地居然似建瓴寸寸秧鍼初出水油油麥浪漸分町牽連茅屋蘿堪補平接松廳翠欲冥占斷高明究誰種耕烟多恐藉龍靈瓦溝披拂菴縱橫壁薜牆蒿比附榮瞻彼屋烏何處止誤他懸馬向空鳴也思廣廈千閒庇那識秋風一夜生披比卷施根務盡漏痕毋再沅雕甍

六月廿日得家書喜大兒

初民將以選貢入都

怪底連朝鵲噪聲書來拔萃有兒名雖非甲乙科堪重差喜栽培樹向榮遲汝三冬行李卸慰余一醜對花傾翻嫌留滯初衷改歸計明年始得成

次韻抱邨子卿屋漏聯句

皇天雨無私，雨屋均華陋。棄故厭趨檐，復古欲中雷。稍稍篷送聲，冷洽蓮滴漏。微涓俯察無，潛暈仰觀覲。忽焉雲雷屯，不辨曉夜晝。九派倒江流，萬竒游羿設。一鼓氣不衰，少休勢來又。泥濘巷無車，市罷物不售。萬瓦謝無權，我居禍日構。及榻苔錢滋，被屋書帶秀。是身若車軸，眾水牙輻輳。愁坐劇拘囚，急避甚逢寇。無名時潛侵，有備幸三覆。須臾水灌城，一決不可救。衣製便思逃，疾作何處走。拍浮卮無當，敲仆器如有。廢傾馬失槽，戶落僕由竇。醞釀鬱兼旬，點滴作重酎。染衣柳汁鮑，蠲紙朶雲湊。眾方數雞棲，我卜投龜詬。沈思旱人得，圩者心孔疚。屋因蔽雨成，瓦以行水發。奈何勢建瓴，不若石上溜。補苴先菊開，彌縫趁槐候。杼柚供情慵，泥水混襍糅。因思若輩心，恐樂終日驟。我棲僅再遷，衾枕黴黑透。治宅力未能，移居詩立就。經涂與環涂，竟無一椽僦。蹢躅丈室中，步延已及表。偉哉二子雄，對敵千言鬥。瀏亮體物工，博洽徵材富。險語破愁雲，一散再不復。哀矜到窮檐，豈弟神所佑。葺君雲霧窗，理我詩書囿。天晴病骨蘇，歸計秋風謬。放懷好共謔，杯酒互勸侑。瑾戶會有時，羔裘詠居究。

壹齋集卷十六

七

七月五日移寓準提庵用田山薑移居韻

韋郎避漏眠于車

謂赤城

王生屋裏頻移家，我居牆壞僕幾壓。舉

室奔竄如驚麋，有庵巷北舊棲息。踏鼓兩度趨朝衙，急移書籠

召橘尤不憚，行步爲敲斜。

時病足

眼明階前兩椿樹，在昔屋後當

梅花

梅花樹下僧廬，昨宵前舍額。

芟夷敗葉聽好鳥，掃除四壁供塗雅。詰朝

七夕約二客

抱邨子卿

庵門月好須常搥，仰天一笑席衣瓦補漏矣。

必煩皇媪

時京師屋漏者，多以席覆之。

次韻子卿四秋詩

秋桑

驚心牆下葉飄蕭曾是羅敷手上條一飼螭蠶成獨繭惟餘絡

緯泣終宵今年河決秋仍溢永定河發源千桑乾往歲邨沽春已燒桑落

猶記小樓夜聽雨涼燈影裏翠如澆古桑書屋半施閣鉞十四年前讀書處

秋柳

絲絲無復翠烟迷搖落長隄更短隄霜重也如青鬢禿花濃會  
繫紫騮嘶折腰陶令懷松菊倦眼邊營送鼓鼙葉葉蛾眉總蕉  
萃不堪依樣畫深閨

秋蘭

底須待女植纔芳一種西風有國香空谷何知怨遲暮騷人枉  
自判炎涼情無嘉蕙開同畝合采靈芝共一房若以春黃門秋

壹齋集卷中六

八

紫鱗須蝶粉太飛揚

秋海棠

誰將紅粉乞吳娃幻出頰霞擁碧階已分榮枯隨玉露無端拗  
折上瑤釵甘蔗葉大彈誰屑叢桂山空隱欲偕襲取西州名莫  
笑無香翻遜爾幽佳

小至日招王吉士

澤梅孝廉 沖吳進士 鳴捷江明經 玉

小集時吳將南歸索畫贈別因題此詩並簡胡處士

朱員外

文翰吳水部 文桂巴訓導 樹穀

萍蓬豆粥嗤齊奴咄嗟而辦羹材麤宋杞食菊貧無徒自詎其

口先迂疏我今獨宦拋妻孥月俸不足腥齋廚有魚一尾酒一

壺便招好友相嬉娛坐中有客延陵吳欲書驢券歸天都爲言

於君無所需但乞一角雲山孤我嬾不畫幾年餘起覓矮紙濡

豪塗不寬不顛亦不迂西山一抹樹幾株道旁郵店門停車握手且復留斯須君歸篁南樂只且清景待我先描摹門前碧玉水一渠屋後絳萼梅花初到家歲酒傾屠蘇蜜林檎釀邨可酤貓頭筍勝玉版腴牛尾狸笑花豬臠一聲爆竹當街衢四山響應春雷如君家門戶今崔盧世美可匹眉山蘇此行況未飛雙鳧如石韞玉蚌孕珠湖洞倘見浯溪朱解后巴吳城東胡道我鬢白漸及須窮愁不復能著書池魚日夕思江湖酒酣豪氣未盡除猶是昔日貪饕夫河西酒樓飲或釀勿忘今夕曾圍爐春明花發來剖符爲君更作山泉圖

醉後

我久不能飲寒甚輒數觴數觴亦已醉忽發狂奴狂張目奮口吻排擊含風霜那知四座驚但磬中心藏我年過五十髮白顏已蒼安能從少年屈曲佻優場爲輪待曲木欲室需毛嬙畢世不可遂何復求徬徨願言釋羈疾歲晚歸茅堂

望初兒至

聞說行期廿日過計程當早渡黃河憐渠乍歷冰霜苦見我應驚鬢髮皤訪舊預思燈燭共迎年喜對酒樽歌方憂汝伯偕諸弟遠別霑襟奈若何

題堅甫壬戌歲朝圖

憶我從兒戲回頭五十年折花能上樹爆竹不論錢巷犬羣驚吠鄰雞聽嬾眠展圖搔白髮惜未采豪傳  
來元生及晬歲晚我朝京自顧難爲祖憐渠已作兄團圓尊酒樂眉目畫圖清留取唐花在燈前問阿鳴

壹齋集卷十七

當塗 黃 鉞 左田

古今體詩三十七首 盡壬戌一年

孟陬四日與子卿夜坐三次舊寢軒韻

年頭歲尾走東華三度移家未是家強約故人來竝宅相將賀  
正共登車踏青畧記鞦同繫鐻白難勝鬢日加脫卻朝衫拈畫  
筆湖亭幸不在天涯 時與子卿合作山水長卷

空羨天隨屋舟楫何時得遂耦耕情泉如在澗終難濁琴本無  
弦那用更李白蓬蒿甘共老蘭成詞賦枉知名輪君正作新年  
寢我已雙輪碾雪鳴

蛩蟹何曾利走趨也隨麋鹿躡蓬壺刻成桃李終非實畫出毛  
施卻易摹喜靖兵氛傳鼓吹好調和氣播筵竿顏蒼髮白今年

壹齋集卷十七

甚只稱扁舟泛五湖 東坡詩白髮蒼顏五十  
三歲今年正五十三

短檠分照一編開對把淡杯注綠醅百歲光陰今過半兩家子  
弟急需才花經活火看徐放春到征鴻取次回循吏儒林當並  
讀和羹時正要鹽梅

三月朔日澄懷園直廬作

柳色烟光綠漸勻園居最好是三春編籬徑誤常來客疊石階  
便小憩人初日杏花紅破萼晚風池水碧生鱗連朝上巳清明  
到惟欠流鶯入耳新

三月八日夏莊送 駕歸雲檐司空招陪石庵相國石

君夫子煦齋司農極樂寺看花石君夫子有詩用韻奉

和

杏花春色酣楊柳青旗映屬車靜無塵歸路斂餘敬追陪黃閣

老接軫綠莎徑風驅遵河塹波活船可榜行行憩招提佳日游  
蹤更庚申九月山門犬載嗅花樹僧出迎娟妍門白紅結東晨  
妝靚盆蘭碧箭抽山茶紅萼逆臨風玉樹新高架木香橫鸞枝  
閒海棠兩兩色相競玲塀白牡丹出窰母乃瀨阿那狀需嵇瑣  
細箋漏鄭照眼觸鄉思三月于湖盛山秀可療飢艸香欲蘇病  
林淡鶯炙簧水暝魚躍鏡春雲白於衣新酒清如聖卅年樂不  
支一別苦無脛茲游豁心胸取道不幽篁何幸夔龍旁得遂麋  
鹿性歡顏釋羈愁繼聲發高詠

送江明經玉歸歛

江君先我來京師小住三年卻先去留君無計送君歸那忍臨  
歧贈無句君年二十美且都天機清妙裴王徒文工畫妙兩無  
敵山花溪月相嬉娛昨來京兆赴秋試公卿交口互嗟異試文  
乍出十手鈔名字應須榜頭置一椎博浪竟誤投羣噴毀譽何  
悠悠有才如此且姑去遺珠象罔終能求眼前多少嫺風雅文  
字鄒枚經鄭馬攬袂誰憐失意人知心剩有窮愁者憑君歸語  
山中友丹桂碧桃無恙否讀書須讀濟時書飲酒惟傾看花酒  
衰慵昔昔躑江南白髮蒼顏五十三黃山有約終當赴何日因  
君結一庵

園居雜感

難將瘦骨敵炎曦坐餽遭炊百不宜滿樹紅茸一簾雨去年今  
日病來時

繞屋荷花出水新曉風夜月也憐人如何卻憶崇仙院不是田  
衣山屐身

槐柳陰濃小院清門無車馬不煩局蟬聲尙啞蛙聲老倦枕簟

騰帶癭聽

籬邊石罅暫裴回  
萱艸戎葵次第開  
盼得芭蕉新葉大  
打窗風雨也應來

豆莢瓜藤碧蔓牽  
任他鹿眼自沿緣  
朝來移密將疏補  
便覺臨風不自然

野蛾不解入花叢  
粉蝶吟嬾態本工  
寄語滕王漫分別  
前身一樣可憐蟲

天際閒雲自在飛  
炎歊未解午風微  
碧空點綴看元好  
不雨桑麻只合歸

自截長竿繫釣絲  
暫垂池畔卻慵持  
漁翁怪底頭多白  
耐得風斜雨細時

好花移便少精神  
抱甕難辭出汲頻  
直爲閒人間讚賞  
可憐辛

苦灌園人

不羨蘭成賦小園  
底須別業置藍田  
但求百斛長腰米  
補我三年跂腳眠

戲咏董四墓桃

誰植芳桃識所藏  
如何桃熟客先僵  
品緣小異名稍重  
種或移栽實弗良  
曉露窺園青似膽  
涼風下馬玉流漿  
只愁碣字蒼苔蝕  
覓路提筐惱謝娘

苦瓜聯句

並序

苦瓜一名錦荔支  
一名癩葡萄京師人  
又呼爲裂瓜蓋  
以其熟則自裂也  
李時珍本艸綱目  
云原出南番種於  
閩廣今則到處有之

苦瓜生南番鉞滋蔓先閩廣  
流傳到中原澤瘠沃不擇壤  
種子



春夏交花玉瓣引須籬壁上玉楮葉畧同澤金梳花微仿本艸綱目云開小黃

如椀形實員楸脫模鍼皮痒癢欲痒其苦味維時澤曰瓜名亦

強生剝蝦蟆衣鍼熟褫稚子禰破惡蒲桃寬錫嘉荔子獎善

裂俗名因鍼貪核饒兒攘差堪擬鴻頭澤云何儷虎掌人情嗜

好殊鍼五味令口爽茹茶或不安澤啖此乃交倣盪觴自南烹

鍼尋常逮竈養頓使刈菜畦澤不得遂生長西風七月涼鍼老

圃三年想籬根蟋蟀吟澤棚罽絡緯紡金刀副蜜筒鍼水香上

簾幌謀歸秋為期澤不去神已往無年送新愁鍼有敦記昔賞

可憐守瓜蟲澤何時脫塵網鍼

玉簪花聯句

謝客人事閒好雨栽花可鍼移菊籬未編種梅鉏待荷澤園丁

來郊垌秋英擔婀娜鍼玉簪花兩叢娟若二女果澤碧葉敷冬

壹齋集卷十七 四

菘青莖蠹夏苻鍼枝枝相對橫戢戢尙含朵澤呼童植瓦盆依

欄遠塵堞鍼清涼朝軸簾寂莫人離坐澤徵名爾雅遺為用本

艸夥鍼雕鑄造物工取象釵笄瑣澤搏雪洗未能翦通為亦巨

儼從寶髻導乍啓鏡斂鎖澤半出插稍偏全抽危欲墮鍼微

風送清芬恍惚綠雲鞞澤搔頭將遺誰短髮不勝我鍼堆牀但

縹緗侍寢無嫫媼澤惟欵白玉冠自看丹爐火鍼秋晴幽趣多

清供虛齋頗澤馬藍紫方濃雞冠紅未妥鍼酤酒擬盃朋且復

纜歸舸澤

示初民

乘車且莫羨朝官欲稱明經也大難愧我無書令誦讀憐渠何  
計免飢寒捉將官裏頭全白老去光陰指一彈尙有家園諸弟  
在今年廢學又將殫

爲鮐日鏞題堅甫設色秋花

去年作畫長安客展卷題詩今到家不識烏聊秋滿徑穠鮮可似畫中花

題畫爲子卿編修作

曉涼衣冷欲裝綿暢好西風剝棗天送客不知凡幾輩還家空說又經年挂名朝籍慙何補結社溪亭舊有緣卻笑坡仙誑江水不歸未必爲無田

繆員外元益

以筐蟹見貽竝附駢詞小啓賦尖團二韻

謝之

曉雲將雨暗前檐落落琴聲響入簾卻媿楊風酬簡翰安思江月在霜筍美供牢九方新授生帶微糟醉不嫌到手忽矜鄉味異爬磯爪秃老無尖江蟹上驛磯爪爲之秃謂之爬磯蟹最肥美

壹齋集卷十七

五

江國朝魁秋已闌長安七月早登盤鳴薑且當金鑿膾對菊猶遲白露團兒病未能聊獨酌客歸誰復勸加餐子卿南歸已三日多君爲我支重九領取西風十日歡

寄少民

三年不見汝一卷獨開予差喜得臣筆還應讀父書持家當慮後擇友在交初好守身如玉科名事乃餘

書蔡忠惠集後

有宋慶厯全盛日賢人君子盈朝端拔茅連茹以其彙一日被命三諫官臣襄抗疏重有請任諫非難用諫難更言災異至再四不憚披腹呈琅玕公然上斥陛下失聞者竦立危難安談兵要立備邊患二虜形勢胸中刊當時廟堂計果決事業何止范與韓惜哉一載卽出守徒令泉福民騰歡後生讀書不解事輒

以小節求瑕癥前丁後蔡有遺議更舉彥國譏龍團那知茶錄  
具深意盡材得地言非謾

僅爲茶言也

即令方物偶錫貢要非花鳥求羅紈是時仁宗求治急

朝無朋黨爭傷殘呂公晏公亦人傑乃遭彈劾膚無完同時四  
賢一不肖詩章傳寫張契丹高君羞慙若撻市面皮雖老非權  
奸倘令章蔡生竝世毒鋒讒刃交相攢讀公詩文幸公遇反復  
諷咏使我心膽寒

### 九日寄子卿

寢回飛電光繞牀疾雷震瓦風雨狂秋衾温暝睡不得猛思明  
日爲重陽晨興雨止風未止啓戶飄颻衣生涼忽聞花糕巷唱  
賣節物抵灰催人忙今年氣候甚妍暖東籬未見黃花黃雞冠  
蕉萃玉簪老玲竅猶剩秋海棠偃蹇一夕又摧落頓令三徑成

### 壹齋集卷十七

滄桑登高出門悵無伴故人別我還江鄉車程計日旬有八倘

無留滯登吳航枚皋宅畔訪鮑照

固叔此說

定剝紫蟹鳴新薑酒邊

談笑應及我進退不決隨朝行那知組綬苦束縛不及窮餓能

仿佯憶昔家居迫佳節淋漓酒盞菜萸囊陶塘碧波漲宿雨范

蘿紅樹合新霜同游翫屐盡年少就中長者四十強合圖卓犖

幾人在在者須鬢行皆蒼

戊戌登高合圖畫者六人今惟余兄弟存焉

人生及時要

行樂莫待衰至追流光羨君歸路好風景觸我旅况彌悽惶無

花無酒作重九徒當蟋蟀歌慨慷臨風攄寫遠相報候我春渚

停歸艍

汪生樹棠攜鉞乾隆壬子歲所作黃山圖於京師

我游黃山歲一紀作此畫亦十年矣山靈久別如故人賴有故  
人留此紙爾時信手塗抹成此日游蹤尙能指始信峯頭弄玉

簫光明頂上清歌起左把浮邱右阮公我友當年樂忘死謂八  
君慰君慰嗟予流轉滯長安顏鬢摧頽腰腳頑卻從人海望雲海慚友已

愧還山又出山

當塗顧明府之葵用許丁卯姑孰官舍詩韻作七十自

述詩索京師故人和之次韻奉寄

京居鮮暇又園居一歲無因再致書自壽方知君七十塵勞應  
恕我羸疏宦情閒靜陶彭澤家法清嚴華子魚化得州民盡能

咏誦聲時出野人廬

官衙瀟灑似家居齋榜曾教秉燭書柯軒額列坐門生新聞

舊上窗槐影密還疏於時設帳方慚馬時士講敬不意投竿又

羨魚一自青山揮手別清班三載玷周廬敷書院

名賢自昔此邦居往事牽連可竝書瑞雲堂深人簡率秀江

壹齋集卷十

古樹扶疏腰支裊娜雖無伎溪水肥甘鄧有魚見山峇姑溪題

合與使君持獻壽蹉跎悔未返蓬廬跋放翁入蜀記

薄莫偶成六言

鴉循空際歸路月印窗楞舊痕曳履階從倚呼兒小立黃昏  
聽說故鄉風景因思近郭江邨楓葉紅過山麓菊花香到庵門

聞近年菊花以  
福田庵為勝

寄子卿

瞥眼清風已戒寒記看上馬拂征鞍偶然計日行將到如此言  
歸不算難過我酒邊談往事有人屏後聽長安殷勤為勸諸兒

學莫效家公嬾作官

送同年汪選歸蕪湖時汪批  
選教諭

汪君老不衰厚重見儀貌不愧古孝廉允宜官學校春官八上

歸一職喜可效人生貴無常枉用流品較昔猶雖不甘飽食任  
眠覺子孫無越思詩書大可教鬻予再出山三年直廬儂烏帽  
減頭圍紅塵沒鞞勒窮巷僦數椽門閉客不敲晨出莫來歸冷  
卿冰一窖酒借市酌醪飯取溫湯滄坡教切面詐背復欺惟便凡  
由命金機子有罵奴而何堪觸離懷又送君歸權應笑負馱驢  
幾時出淖命名風者凡出也

韓城夫子以大學士在告 詔許扶杖人對養心殿石

君參知夫子作詩紀其事次韻奉和呈韓城夫子

伊耆齒杖禮所崇未聞拄之朝法宮天麟金龍有故事但憐衰

老扶其躬元史石麟年七十餘帝以金龍頭杖錫令杖以出入官掖我

皇用公作模楷特嘉知止 恩寵鴻許持靈壽對便殿搏桑正

射貂裘豐懿哉可備禮經闕勿徒羨此也華隆開春角巾就私

壹齋集卷十

第異數豈僅誇蒲潼疏班邴魏太寥落聊以勇退還淳風頌揚

盛德弟子職繼聲大雅難爲工知公此志廿年久 賜園橐筆

會隨公乾隆已酉侍師於海定承佑園爾時已有歸志待公安車祝 曼壽看撰綠玉

呈丹衷

癸亥歲朝圖 並引

妣頤真畫鍾馗野溷一豪豬卽之妹子持杖趕逐世未

見其本載於龔聖子中山夜游圖跋中初民仿其意爲

癸亥歲朝圖蓋歲除獻鍾馗而歲名歲陽聲意適有關

合戲爲補景而系之以詩

癯穢得錢財收豕致丞相髻君辟邪能妹子禦侮壯妣畫本久

亾龔跋景會狀拈來盡吉祥想像得意匠兒子強解事胡盧畫

依樣謂與歲干支聲意可依傍借作歲朝圖裝潢壁間障我更

進一言願兒聽母安昔人勤文章功夫在三上承官竊聽經棄  
豬甘受掠境物夫何常至人兩相安兒家雖清貧喜氣如春釀  
弟妹凡七人式好皆無恙求財糞穢閒知汝定不向惟期負書  
囊急雇車一輛歸舟泛晴湖紅看山桃放二母彘幾何傾貲買  
可諒食豕如食人一任彭亨脹大道在尿溺履豨下愈況莊生  
不欺余飲酒且無量閣筆未初更已聞放爆仗

壹齋集卷十

郭五

